



晋書  
六



待  
伊8  
1735  
68



特  
1735  
68

晉書二十二

志第十二

樂上

夫性靈之表不知所以發於詠歌感動之端不知所以關於手足  
 生於心者謂之道成於形者謂之用譬諸天地其猶影響百獸率  
 舞而況於人乎美其和平而哀其喪亂以茲援律乃播其聲焉農  
 瑟羲琴倕鍾和磬達靈成性象物昭功由此言之其來自遠殷氏  
 不綱遺風餘孽淫奏既興雅章奔散英莖之制蓋已微矣孔子曰  
 人能弘道非道弘人周始二南風兼六代昔黃帝作雲門堯作咸  
 池舜作大韶禹作大夏殷作大濩周作大武所謂因前王之禮設  
 俯仰之容和順積中英華發外書稱命夔典樂教胄子則周官所  
 謂奏大呂歌黃鍾天貺來下人祇動色抑揚周監以弘雅音及褒



此係明治八年八月八日  
 月廿八日  
 州山田一  
 郎若以  
 所購諸



西川忠鳳  
 氏書印

艷興災平王逢亂禮廢親疎樂沈河海是以延陵季子聞歌小雅  
曰其周德之衰乎猶有先王之遺風焉而列壤稱孤各興吟詠魏  
文侯聆古樂而恐臥晉平公聽新聲而忘食先王之道漸以陵夷  
八方殊風九州異則秦氏并吞遂專刑憲至於絃歌詩頌干戚旄  
羽投諸烟火埽地無遺漢祖提劍寰中削平天下文匪躬於德化  
武有心於制作太后擯儒家之道大臣排賈氏之言搢紳先生所  
以長歎而子政仲舒猶不能已也炎漢中興明皇帝卽位表圭景  
而陳清廟樹槐陰而疏璧流祀光武於明堂以配上帝召栢榮於  
太學袒而割牲濟濟焉皇皇焉有足觀者自斯厥後禮樂彌殷永  
平三年官之司樂改名大予式揚典禮旁求圖讖道隣雅頌事邇  
中和其有五方之樂者則所謂大樂九變天神可得而禮也其有  
宗廟之樂者則所謂肅雍和鳴先祖是聽者也其有社稷之樂者

則所謂琴瑟擊鼓以迓田祖者也其有辟雍之樂者則所謂移風  
易俗莫善於樂者也其有黃門之樂者則所謂宴樂羣臣蹲蹲舞  
我者也其有短簫之樂者則所謂王師大捷令軍中凱歌者也魏  
武挾天子而令諸侯思一戎而匡九服時逢吞滅憲章咸盪及削  
平劉表始獲杜夔揚輦總千式遵前記三祖紛綸咸工篇什聲歌  
雖有損益愛翫在乎雕章是以王粲等各造新詩抽其藻思吟詠  
神靈贊揚來饗武皇帝採漢魏之遺範覽景文之垂則鼎鼎唯新  
前音不改泰始九年光祿大夫荀勗始作古尺以調聲韻仍以張  
華等所制高文陳諸下管永嘉之亂伶官旣減曲臺宣榭元本  
作日變污萊雖復象舞歌工自胡歸晉至於孤竹之管雲和之瑟空桑  
之琴泗濱之磬其能備者百不一焉夫人受天地之靈蘊菁華我  
作  
之氣剛柔遽用哀樂分情經春陽而自喜遇秋彫而不悅遊乎金

石之端出乎管絃之外因物遷逝乘流不反是以楚王升輕軒於彭蠡漢順聽鳴鳥於樊衢聖人功成作樂化平裁曲乃揚節奏以暢中和飾其歡欣止於哀思者也凡樂之道五聲八音六律十二管爲之綱紀云

五聲宮爲君宮之爲言中也中和之道無往而不理焉商爲臣商之爲言強也謂金性之堅強也角爲民角之爲言觸也謂象諸陽氣觸物而生也徵爲事徵之爲言止也言物盛則止也羽爲物羽之爲言舒也言陽氣將復萬物孳育而舒生也古人有言曰禮樂不可斯須去身化上遷善有如不及是以聞其宮聲使人溫良而寬大聞其商聲使人方廉而好義聞其角聲使人惻隱而仁愛聞其徵聲使人樂養而好施聞其羽聲使人恭儉而好禮

八音八方之風也乾之音石其風不周坎之音革其風廣莫艮之

音匏其風融震之音竹其風明庶巽之音木其風清明離之音絲其風景坤之音土其風涼兌之音金其風閭闔

陽六爲律謂黃鍾太簇姑洗蕤賓夷則無射陰六爲呂謂大呂應鍾南呂林鍾仲呂夾鍾凡有十二以配十二辰焉律之爲言法也言陽氣施生各有法也呂之爲言助也所以助成陽功也正月之辰謂之寅寅者津也謂生物之津塗也二月之辰名爲卯卯者茂也言陽氣生而孳茂也三月之辰名爲辰辰者震也謂時物盡震動而長也四月之辰謂爲巳巳者起也物至此時畢盡而起也五月之辰謂爲午午者長也大也言物皆長大也六月之辰謂之未未者味也言時萬物向成有滋味也七月之辰謂爲申申者身也言時萬物身體皆成就也八月之辰謂爲酉酉者緝也謂時物皆緝縮也九月之辰謂爲一作戌戌者滅也謂時物皆衰滅也十月

之辰謂為亥亥者芻也言時陰氣芻殺萬物也十一月之辰謂為子子者孳也謂陽氣至此更孳生也十二月之辰謂為丑丑者紐也言終始之際以紐結為名也十一月之管謂之黃鍾黃者陰陽之中色也天有六氣地有五才而天地數畢焉或曰冬至德氣為土土色黃故曰黃鍾正月之管謂為太簇簇者簇也謂萬物隨於陽氣太簇而生也三月之管名為姑洗姑洗者姑枯也洗濯也謂物生新潔洗除其枯改柯易葉也五月之管名為蕤賓蕤賓蕤一作垂下貌也賓敬也謂時陽氣下降陰氣始起相賓敬也七月之管名為夷則夷平也則法也謂萬物將成平均一作均皆有法則也九月之管名為無射射者出也言時陽氣上升萬物收藏無復出也十二月之管名為大呂呂者助也謂陽氣方之陰氣助也十月之管名為應鍾應者和也謂歲功皆成應和陽功收而聚之也八月

之管名為南呂南呂宋作者任也謂時物皆秀有懷任之象也六月之管名為林鍾林林一無字者林茂也謂時物茂盛於野也四月之管名為仲呂者呂助也謂陽氣盛長陰助成功也二月之管名為夾鍾者夾佐也謂時物尚未盡出陰德佐陽而出物也漢自東京大亂絕無金石之樂樂章亡缺不可復知及魏武平荊州獲漢雅樂郎河南杜夔能識舊法以為軍謀祭酒使制定雅樂時又有散騎侍郎鄧靜尹商善訓雅樂歌師尹胡能歌宗廟郊祀之曲舞師馮肅服養曉知先代諸舞夔悉總領之遠詳經籍近採故事考會古樂始設軒懸鍾磬而黃初中柴玉左延年之徒復以新聲被寵改其聲韻及武帝受命之初百度草創泰始二年詔郊祀明堂禮樂權用魏儀遵周室肇稱殷禮之義但改樂章而已使傅玄為之詞云

祀天地五郊夕牲歌

天命有晉 穆穆明明 我其夙夜 祇事上靈 常于時假

迄用其成 於薦玄牡 進夕其牲 崇德作樂 神祇是聽

祀天地五郊迎送神歌

宣文蒸哉 日靖四方 永言保之 夙夜匪康 光天之命

上帝是皇 嘉樂殷薦 靈祚景祥 神祇降假 享福無疆

饗天地五郊歌

天祚有晉 其命惟新 受終于魏 奄有黎民 燕及皇天

懷和百神 丕顯遺烈 之德之純 享其玄牡 式用肇禋

神祇來格 福祿是臻 時邁其猶 昊天子之 祐享有晉

肇庶戴之 畏天之威 敬授人時 丕顯丕承 於猶繹思

皇極斯建 庶績咸熙 庶幾夙夜 惟晉之祺 宣文惟后

克配彼天 撫寧四海 保有康年 於乎緝熙 肆用靖民

爰立典制 爰修禮紀 作民之極 莫匪資始 克昌厥後

永言保之

天地郊明堂夕牲歌

皇矣有晉 時邁其德 受終于天 光濟萬國 萬國既光

神定厥祥 虔于郊祀 祇事上皇 祇事上皇 百福是臻

巍巍祖考 克配彼天 嘉牲匪歆 德馨惟饗 受天之祐

神化四方

天地郊明堂降神歌

於赫大晉 應天景祥 二帝邁德 宣此重光 我皇受命

奄有萬方 郊祀配享 禮樂孔章 神祇嘉享 祖考是皇

克昌厥後 保祚無疆

天郊饗神歌

整泰壇	禮皇神	精氣感	百靈賓	蘊朱火	燎芳薪
紫烟遊	冠青雲	神之體	靡象形	曠無方	幽以清
神之來	光景昭	聽無聞	視無兆	神之至	舉歆歆
靈爽協	動余心	神之坐	同歡娛	澤雲翔	化風舒
嘉樂奏	文中聲	八音諧	神是聽	咸絜齊	並芬芳
烹牲牲	享玉觴	神悅饗	歆禋祀	祐大晉	降繁祉
作京邑	廣四海	保天年	窮地紀		
地郊饗神歌					
整泰圻	竣皇祇	衆神感	羣靈儀	陰祀設	吉禮施
夜將極	時未移	祇之體	無形象	潛泰幽	洞忽荒
祇之出	夢若有	靈無遠	天下母	祇之來	遺光景

昭若存	終冥冥	祇之至	舉欣欣	舞象德	歌成文
祇既坐	同歡豫	澤雨施	化雲布	樂八變	聲教敷
物咸亨	祇是娛	齊既絜	侍者肅	玉觴進	咸穆穆
饗嘉豢	歆德馨	祚有晉	暨羣生	溢九壤	格天庭
保萬壽	延億齡				

明堂饗神歌

經始明堂	享祀匪懈	於皇烈考	光配上帝	赫赫上帝
既高既崇	聖考是配	明德顯融	率土敬職	萬方來祭
常于時假	保祚永世			
祠廟夕牲歌				
我夕我牲	猗歟敬止	嘉豢孔時	供茲享祀	神鑒厥誠
博碩斯歆	祖考降饗	以虞孝孫之心		

祠廟迎送神歌

嗚呼悠哉 日監在茲 以時享祀 神明降之 神明斯降  
既祐饗之 祚我無疆 受天之祐 赫赫太上 巍巍聖祖  
明明烈考 丕承繼序

祠征西將軍登歌

經始宗廟 神明戾止 申錫無疆 祇承享祀 假哉皇祖

綏子孫子 燕及後昆 錫茲繁祉

祠豫章府君登歌

嘉樂肆筵 薦祀在堂 皇皇宗廟 乃祖乃皇 濟濟辟公

相予蒸嘗 享祀不忒 降福穰穰

祠潁川府君登歌

於邈先后 實司于天 顯矣皇祖 帝祉肇臻 本枝克昌

資始開元 惠我無疆 享祚永年

祠京兆府君登歌

於惟曾皇 顯顯令德 高明清亮 匪競柔克 保乂命祐

基命惟則 篤生聖祖 光濟四國

祠宣皇帝登歌

於鑠皇祖 聖德欽明 勤施四方 夙夜敬止 載敷文教

載揚武烈 匡定社稷 龔行天罰 經始大業 造創帝基

畏天之命 于時保之

祠景皇帝登歌

執競景皇 克明克哲 旁作穆穆 惟祇惟畏 纂宣之緒

耆定厥功 登此雋乂 糾彼羣凶 業業在位 帝既勤止

惟天之命 於穆不已



祠文皇帝登歌

於皇時晉 允文文皇 聰明獻智 聖敬神武 萬機莫綜  
皇斯清之 虵豕放命 皇斯平之 柔遠能邇 簡授英賢  
創業垂統 勲格皇天

祠廟饗神歌二篇

曰晉是帝 享祀時序 宗廟致敬 禮樂具舉 惟其來祭

普天率土 犧樽既奠 清醑既載 亦有和羹 薦羞斯一作備

蒸蒸永慕 感時興思 登歌奏舞 神樂其和 祖考來格

祐我邦家 溥天之下 罔不休嘉

肅肅在位 濟濟臣工 四海來格 禮儀有容 鍾鼓振

管絃理 舞開元 歌永始 神胥樂兮 肅肅在位

臣工濟濟 小大咸敬 上下有禮 理管絃 振鼓鍾

舞象德

歌詠功

神胥樂兮

肅肅在位

有來雍雍

穆穆天子

相維辟公

禮有儀

樂有則

舞象功

歌詠德

神胥樂兮

杜夔傳舊雅樂四曲一曰鹿鳴二曰騶虞三曰伐檀四曰文王皆古聲辭及太和中左延年改夔騶虞伐檀文王三曲更自作聲節其名雖存而聲實異唯因夔鹿鳴全不改易每正旦大會太尉奉璧群后行禮東廂雅樂常作者是也後又改三篇之行禮詩第一曰於赫篇詠武帝聲節與古鹿鳴同第二曰巍巍篇詠文帝用延年所改騶虞聲第三曰洋洋篇詠明帝用延一作文王聲第四曰復用鹿鳴鹿鳴之聲重用而除古伐檀及晉初食舉亦用鹿鳴至泰始五年尚書奏使太僕傳玄中書監荀勗黃門侍郎張華各造正旦行禮及王公上壽酒食舉樂歌詩荀勗云魏氏行禮

食舉再取周詩鹿鳴以爲樂章又鹿鳴以宴嘉賓無取於朝考之  
舊聞未知所應最乃除鹿鳴舊歌更作行禮詩四篇先陳三朝朝  
宗之義又爲正旦大會王公上壽歌詩并食舉樂歌詩合十三篇  
又以魏氏歌詩或二言或三言或四言或五言與古詩不類以問  
司律中郎將陳頎頎曰被之金石未必皆當故最造晉歌皆爲四  
言唯王公上壽酒一篇爲三言五言焉張華以爲魏上壽食舉詩  
及漢氏所施用其文句長短不齊未皆合古蓋以依詠弦節本有  
因循而識樂知音足以制聲度曲法用率非凡近之所能改二代  
三京襲而不變雖詩章辭異廢興隨時至其韻逗留曲折皆繫於  
舊有由然也是以一皆因就不敢有所改易此則華最所明異旨  
也時詔又使中書侍郎成公綏亦作焉今並採列之云

四廂樂歌

正旦大會行禮歌

成公綏

穆穆天子	光臨萬國	多士盈朝	莫匪俊德	流化罔極
王猷允塞	嘉會置酒	嘉賓充庭	羽旄 <sub>謂</sub> 宸極	鐘鼓振泰清
百辟朝三朝	式式明儀形	濟濟鏘鏘	金聲玉振	禮樂具
宴嘉賓	眉壽作聖皇	景福惟日新	群后戾止	有來雍雍
獻酬納贄	崇此禮容	豐羞萬俎	旨酒千鍾	嘉樂盡宴樂
福祿咸攸同	樂哉	天下安寧	道化行	風俗清
簫韶作	詠九成	年豐穰	世泰平	至治哉
樂無窮	元首聰明	股肱忠	樹豐澤	揚清風
嘉瑞出	靈應彰	麒麟見	鳳凰翔	醴泉湧
流中唐	嘉禾生	穗盈箱	降繁祉	祚聖皇
承天位	統萬國	受命應期	授聖德	四世重光

宣開洪業 景克 文欽明 德彌彰 肇啓晉邦

流祚無疆 鳳凰龍興 龍興伊何 享祚萬乘 奄有八荒

泰始建元 圖書既煥 金石有徵 德光大 道熙隆

化育黎蒸 格皇穹 奕奕萬嗣 明明顯融 高朗令終

被四表 與天比崇 奕奕萬嗣 明明顯融 高朗令終

保茲永祚 與天比崇 奕奕萬嗣 明明顯融 高朗令終

聖皇居四海 應天期 三葉合重光 泰始開洪基 明曜參日月

功化侔四時 宇宙清且泰 黎庶咸雍熙 善哉雍熙 總齊璇璣

惟天降命 翼仁祐聖 於穆三皇 載德彌盛 興至仁

光統七政 百揆時序 化若神聖 四海同風 呈皇群賢

濟民育物 擬陶均 擬陶均 垂惠潤 垂後昆

峨峨英雋 德化宣 芬芳播來胤 播來胤 垂後昆

清廟何穆穆 皇極闢四門 皇極闢四門 萬機無不綜 疊疊翼翼

樂不及荒 饑不遑食 大禮既行 樂無極 登崑崙

上層城 乘飛龍 升泰清 冠日月 佩五星

揚虹蜺 建篳旌 披慶雲 蔭繁榮 覽八極

遊天庭 順天地 和陰陽 序四時 曜三光

張帝網 正皇綱 播仁風 流惠康 邁洪化

振靈威 懷萬方 納九夷 朝闈闔 宴紫微

建五旗 羅鍾簴 列四懸 奏韶武 鏗金石

揚旌羽 縱八佾 巴渝舞 詠雅頌 和律呂

于胥樂 樂聖主 巴渝舞 詠雅頌 和律呂

化蕩蕩 清風泄 總英雄 御俊傑 開宇宙

掃四裔 光緝熙 美聖哲 超百代 揚休烈

煌煌七曜	重明交暢	我有嘉賓	是應是貺	邦政既圖
食舉樂東西廂歌	荀勗	休祚鍾聖躬		
我皇茂而高	本枝奮百世	休祚鍾聖躬		
踐元辰	延顯融	獻羽觴	祈令終	我皇壽而隆
正旦大會王公上壽酒歌	荀勗	受靈之祐	於萬斯年	
仰化青雲	俯育重川	龍飛在天	與靈合契	通德幽玄
垂慶洪胤	明明聖帝	肇建帝業	開國有晉	載德奕世
實天生德	誕應靈運	肇建帝業	開國有晉	載德奕世
九域有截	天命降監	啓祚明哲	穆穆烈考	克明克雋
光光景皇	無競惟烈	匡時拯俗	休功蓋世	宇宙既康
受命應期	神武鷹揚	大化咸熙	廓開皇衢	用成帝基
流景祚	顯萬世	皇皇顯祖	翼世佐時	寧濟六合

善世不伐	服事三分	德博化隆	道昌無垠	隆化洋洋
則天作孚	大哉爲君	慎徽五典	帝載是勤	文武發揮
皇塗煥景	七德咸宣	其寧惟永	猗歟盛歟	先皇聖文
烈文伯考	時維帝景	夷險平亂	威而不猛	御衡不迷
正世立則	變化不經	民無瑕慝	創業垂統	兆我晉國
天被顯祿	福履是綏	赫矣太祖	克廣明德	廓開宇宙
明照九畿	思輯用光	時罔有違	陟禹之跡	莫不來威
昔我三后	大業是維	今我聖皇	焜耀前暉	奕世重規
亦有兄弟	胥子陪寮	憲茲度楷	觀願養正	降福孔偕
既朝乃宴	以洽百禮	頒以位叙	或庭或陛	登儼台叟
接以大饗	人之好我	式遵德讓	賓之初筵	藹藹濟濟

帝命溥將	登我晉道	越惟聖王	龍飛革運	臨燾八荒
獻詰欽明	配蹤虞唐	封建厥福	駿發其祥	三朝習吉
終然允臧	其臧維何	總彼萬方	元侯列辟	四嶽藩王
時見世享	率茲有常	旋揖在庭	嘉客在堂	宋衛既臻
陳留山陽	有賓有使	觀國之光	貢賢納計	獻璧奉璋
保祐命之	申錫無疆	振鷺于	鴻漸其翼	京邑穆穆
四方是式	無競維人	王綱允勅	君子來朝	言觀其極
虞虞大君	民之攸暨	信理天工	惠康不置	將遠不仁
訓以醇粹	幽明有倫	俊乂在位	九族既睦	庶邦順比
開元布憲	四海鱗萃	協時正統	殊塗同致	厚德載物
靈心隆貴	敷奏讜言	納以無諱	樹之典象	誨之義類
上教如風	下應如卉	一人有慶	群萌以遂	我后宴喜

令問不墜	既宴既喜	翕是萬邦	禮儀卒度	物其有容
哲哲庭燎	嗶嗶鼓鐘	笙磬詠德	萬舞象功	八音克諧
俗易化從	其和如樂	庶品時邕	時邕斌斌	六合同塵
往我祖宣	威靜殊鄰	首定荆楚	遂平燕秦	疊疊文皇
邁德流仁	爰造草昧	應乾順民	靈瑞告苻	休徵響震
天地弗違	以和神人	既禽庸蜀	吳會是賓	肅慎率職
栝矢來陳	韓滅進樂	宮徵清鈞	西旅獻獒	扶南效珍
蠻裔重譯	玄齒文身	我皇撫之	景命惟新	愔愔嘉會
有聞無聲	清酤既奠	籩豆既升	禮充樂備	簫韶九成
愷樂飲酒	酣而不盈	率土歡豫	邦國以寧	王猷允塞
萬載無傾				

冬至初歲小會歌 張華

日月不留	四氣回周	節慶代序	萬國同休	庶允群后
奉壽升朝	我有壽禮	式宴百僚	繁肴綺錯	旨酒泉淳
笙鏞和奏	磬管流聲	上隆其愛	下盡其心	宜其壅滯
訓之德音	乃宣乃訓	配享交泰	永載仁風	長撫無外
宴會歌	<small>張華</small>			
亶亶我皇	配天垂光	留精日昃	經覽無方	聽朝有暇
延命衆臣	冠蓋雲集	罇俎星陳	肴蒸多品	八珍代變
羽爵無筭	究樂極宴	歌者流聲	舞者投袂	動容有節
絲竹並設	宣揚四體	繁手趣摯	懽足發和	酣不忘禮
好樂無荒	翼翼濟濟			
命將出征歌	<small>張華</small>			
重華隆帝道	戎蠻或不賓	徐夷興有周	鬼方亦違殷	

今在盛明世	寇虐動四垠	豺狼染牙爪	群生號穹旻
元帥統方夏	出車撫涼秦	衆貞必以律	臧否實在人
威信加殊類	踈狄思自親	單醪豈有味	挾纊感至仁
武功尚止戈	七德美安民	遠跡由斯舉	永世無風塵
勞還師歌	<small>張華</small>		
獬豸背天德	構亂擾邦畿	戎車震朔野	群帥贊皇威
將士齊心旅	感義忘其私	積勢如鞞弩	赴節如發機
囂聲動山谷	金光曜素暉	揮戈陵勁敵	武步蹈橫屍
鯨鯢皆授首	北土永清夷	昔往冒隆暑	今來白雪霏
征夫信勒瘁	自古詠采薇	收榮於舍爵	燕喜在凱歸
中官所歌	<small>張華</small>		
先王統大業	玄化漸八維	儀刑孚萬邦	內訓隆壺闈

皇英垂帝典	大雅詠三妃	執德宣隆教	正位理厥機
含章體柔順	帥禮蹈謙祇	螽斯弘慈惠	樛木逮幽微
徽音穆清風	高義邈不追	遺榮參日月	百世仰餘暉
宗親會歌	<small>張華</small>		
族燕明禮順	饌食序親親	骨肉散不殊	昆弟豈他人
本枝薦同慶	棠棣著先民	於皇聖明后	天覆弘且仁
降禮崇親戚	旁施協族姻	式宴盡酣娛	飲御備羞珍
和樂既宣洽	上下同歡欣	德教加四海	敦睦被無垠
泰始九年光祿大夫荀勗以杜夔所制律呂校太樂總章鼓吹八音與律呂垂錯乃制古尺作新律呂以調聲韻事具律歷志律成遂班下太常使太樂總章鼓吹清商施用勗遂典知樂事啓朝士解音律者其掌之使郭夏宋識等造正德大豫二舞其樂章亦張			

華所作之云

正德舞歌 張華

曰皇上天	玄鑒惟光	神器周回	五德代章	祚命于晉
世有哲王	弘濟區夏	陶甄萬方	大明垂曜	旁燭無疆
蚩蚩庶類	風德永康	皇道惟清	禮樂斯經	金石在懸
萬舞在庭	象容表慶	協律被聲	軼武超濩	取節六英
同進退讓	化漸無形	大和宣洽	通於幽冥	
大豫舞歌	<small>張華</small>			
惟天之命	符運有歸	赫赫大晉	三后重暉	繼明紹世
光撫九圍	我皇紹期	遂在璇璣	羣生屬命	奄有庶邦
慎徽五典	玄教遐通	萬方同軌	率土咸雍	爰制大豫
宣德舞功	醇化既穆	王道協隆	仁及草木	惠加昆蟲

億兆夷人 悅仰皇風 丕顯大業 永世彌崇

荀勗又作新律笛十二枚以調律呂正雅樂正會殿庭作之自謂  
宮商克諧然論者猶謂勗暗解時阮咸妙達八音論者謂之神解  
咸常心譏勗新律聲高以爲高近哀思不合中和每公會樂作勗  
意咸謂之不調以爲異已乃出咸爲始平相後有田父耕於野得  
周時玉尺勗以校已所治鐘鼓金石絲竹皆短校一米於此伏咸  
之妙復徵咸歸勗旣以新律造二舞次更修正鐘聲會勗薨未竟  
其業元康三年詔其子藩修定金石以施郊廟尋值喪亂莫有記  
之者

漢高祖自蜀漢將定三秦閬中范因率賓人以從帝爲前鋒及定  
秦中封因爲閬中侯復賓人七姓其俗喜舞高祖樂其猛銳數觀  
其舞後使樂人習之閬中有渝水因其所居故名曰巴渝舞舞曲  
有矛渝本歌曲安弩渝本歌曲安臺本歌曲行辭本歌曲總四篇  
其辭旣古莫能曉其句度魏初乃使軍謀祭酒王粲改創其詞粲  
問巴渝帥李管种玉歌曲意試使歌聽之以考校歌曲而爲之改  
爲矛渝新福歌曲弩渝新福歌曲安臺新福歌曲行辭新福歌曲  
行辭以述魏德黃初三年又改巴渝舞曰昭武舞至景初元年尚  
書奏考覽三代禮樂遺曲據功象德奏作武始咸熙章斌三舞皆  
執羽籥及晉又改昭武舞曰宣武舞羽籥舞曰宣文舞咸寧元年  
詔定祖宗之號而廟樂乃停宣武宣文二舞而同用荀勗所使郭  
瓊宋識等所造正德大豫二舞云



晉書二十一 志第十二終

魏川屯鳳園  
氏圖定南市

晉書二十三

魏川屯鳳園  
氏圖定南市

志第十三

樂下

永嘉之亂海內分崩伶官樂器皆沒於劉石江左初立宗廟尚書  
下太嘗祭祀所用樂名太常賀循答云魏氏增損漢樂以為一代  
之禮未審大晉樂名所以為異遭離喪亂舊典不存然此諸樂皆  
和之以鐘律文之以五聲詠之以歌辭陳之於舞列宮懸在庭琴  
瑟在堂八音迭奏雅樂並作登歌下管各有常詠周人之舊也自  
漢氏以來依倣此禮自造新詩而已舊京荒廢今既散亡音韻曲  
折又無識者則於今難以意言于時以無雅樂器及伶人省太樂  
并鼓吹令是後頗得登歌食舉之樂猶有未備太寧末明帝又訪  
阮孚等增益之咸和中成帝乃復置太樂官鳩集遺逸而尚未有

金石也庾亮為荊州與謝尚修復雅樂未具而亮薨庾翼桓溫專事軍旅樂器在庫遂至朽壞焉及慕容雋平冉閔兵戈之際而鄴下樂人亦頗有來者永和十一年謝尚鎮壽陽於是採拾樂人以備太樂并制石磬雅樂始頗具而王猛平鄴慕容氏所得樂聲又入關右太元中破苻堅又獲其樂工揚蜀等閑習舊樂於是四廟金石始備焉乃使曹毗王珣等增造宗廟歌詩然郊祀遂不設樂今列其詞於後云

歌宣帝

曹毗

於赫高祖 德協靈符 應運撥亂 釐整天衢 勲格宇宙  
化動八區 肅以典刑 陶以玄珠 神石吐瑞 靈芝自敷  
肇基天命 道均唐虞

歌景帝

曹毗

景皇承運 纂隆洪緒 皇羅重抗 天暉再舉 蠢矣二寇  
擾我揚楚 乃整元戎 以膏齊斧 疊疊神算 赫赫王旅  
鯨鯢既平 功冠帝宇

歌文帝

太祖齊聖 王猷誕融 仁教四塞 天基累崇 皇室多難  
嚴清紫宮 威厲秋霜 惠過春風 平蜀夷楚 以文以戎  
奄有叅墟 聲流無窮

歌武帝

曹毗

於穆武皇 允韻欽明 應期登禪 龍飛紫庭 百揆時序  
聽斷以情 殊域既賓 偽吳亦平 晨流甘露 宵應朗星  
野有擊壤 略垂頌聲

歌元帝

曹毗

運屯百六 天羅解貫 元皇勃興 網籠江漢 仰齊七政  
俯平禍亂 化若風行 澤猶雨散 淪光更曜 金輝復煥  
德冠千載 蔚有餘榮

歌明帝

曹毗

明明肅祖 闡弘帝祚 英風夙發 清暉載路 姦逆縱忒  
罔式皇度 躬振朱旗 遂豁天步 宏猷允塞 高羅雲布  
品物咸寧 洪基永固

歌成帝

曹毗

於顯宗 道澤玄播 式宣德音 暢物以和 邁德蹈仁  
匪禮不過 敷以純風 濯以清波 連理映昇 鳴鳳棲柯  
同規放勛 義蓋山河

歌康帝

曹毗

康皇穆穆 仰嗣洪德 為而不宰 雅音四塞 閑邪以誠  
鎮物以默 威靜區宇 道宣邦國

歌哀帝

曹毗

於穆哀皇 聖心虛遠 雅好玄古 大庭是踐 道尚無為  
治存易簡 化若風行 時猶草偃 雖曰登遐 徽音彌闡  
愔愔雲韶 盡美盡善

歌簡文帝

王珣

皇矣簡文 於昭于天 靈明若神 周淡如川 沖應其來  
實與其遷 疊疊心化 日用不言 易而有親 簡而可傳  
觀流彌遠 求本踰玄

歌孝武帝

王珣

天監有晉 欽哉烈宗 同規文考 玄默允恭 威而不猛

約而能通 神鉦一震 九域來同 道積淮海 雅頌自東  
氣陶醇露 化協時雍

四時祠祀 曹毗

肅肅清廟 巍巍聖功 萬國來賓 禮儀有容 鐘鼓振

金石熙 宣兆祚 武開基 神斯樂子 理管絃

有來斯和 說功德 吐清歌 神斯樂子 洋洋玄化

潤被九壤 民無不悅 道無不往 禮有容 樂有式

詠九功 永無極 神斯樂子 朱鷺 思悲翁

漢時有短簫鏡歌之樂其曲有 艾如張 上之回 雍離 戰城南 巫山高

將進酒 君馬黃 上陵 一在巫山高下 有所思 雉子班

聖人出 芳樹 一在君馬黃下 上邪 臨高臺 遠如期

石留

務成

玄雲

黃爵行

釣竿等曲列

於鼓吹多序戰陣之事及魏受命改其十二曲使繆襲為詞述以功德代漢改朱鷺為楚之平言魏也改思悲翁為戰榮陽言曹公也改艾如張為獲呂布言曹公東圍臨淮擒呂布也改上之回為克官渡言曹公與袁紹戰破之於官渡也改雍離為舊邦言曹公勝袁紹於官渡還譙收藏死亡士卒也改戰城南為定武功言曹公初破鄴武功之定始乎此也改巫山高為屠柳城言曹公越北塞歷白檀破三郡烏桓於柳城也改上陵為平南荆言曹公平荆州也改將進酒為平關中言曹公征馬超定關中也改有所思為應帝期言文帝以聖德受命應運期也改芳樹為邕熙言魏氏臨其國君臣邕穆庶績咸熙也改上邪為太和言明帝繼體承統太和改元德澤流布也其餘並同舊名是時吳亦使韋昭制十二曲

名以述功德受命改朱鷺爲炎精缺言漢室衰孫堅奮迅猛志念  
在匡救王迹始乎此也改思悲翁爲漢之季言堅悼漢之微痛董  
卓之亂興兵奮擊功蓋海內也改艾如張爲攄武師言權卒父之  
業而征伐也改上之回爲烏林言魏武旣破荊州順流東下欲來  
爭鋒權命將周瑜逆擊之於烏林而破走也改雍離爲秋風言權  
悅以使人人忘其死也改戰城南爲克皖城言魏武志圖并兼而  
權親征破之於皖也改巫山高爲關背德言蜀將關羽背棄吳德  
權引師浮江而擒之也改上陵曲爲通荊州言權與蜀交好齊盟  
中有關羽自失之憾終復初好也改將進酒爲章洪德言權章其  
大德而遠方來附也改有所思爲順歷數言權順錄圖之符而建  
大號也改芳樹爲承天命言其時主聖德踐位道化至盛也改上  
邪曲爲玄化言其時主修文武則天而行仁澤流洽天下喜樂也

其餘亦用舊名不改及武帝受禪乃令傅玄製爲二十二篇亦述  
以功德代魏改朱鷺爲靈之祥言宣帝之佐魏猶虞舜之事堯旣  
有石瑞之徵又能用武以誅孟達之逆命也改思悲翁爲宣受命  
言宣帝禦諸葛亮養威重運神兵亮震怖而死也改艾如張爲征  
遼東言宣帝陵大海之表討滅公孫氏而梟其首也改上之回爲  
宣輔政言宣帝聖道深遠撥亂反正網羅文武之才以定二儀之  
序也改雍離爲時運多難言宣帝致討吳方有征無戰也改戰城  
南爲景龍飛言景帝克明威教賞順夷逆隆無疆崇洪基也改巫  
山高爲平玉衡言景帝一萬國之殊風齊四海之垂心禮賢養士  
而纂洪業也改上陵爲文皇統百揆言文帝始統百揆用人有序  
以敷太平之化也改將進酒爲因時運言因時運變聖謀潛施解  
長蛇之交離群桀之黨以武濟文以邁其德也改有所思爲惟庸

蜀言文帝既平萬乘之蜀封建萬國復五等之爵也改芳樹為天序言聖皇應歷受禪弘濟大化用人各盡其才也改上邪為大晉承運期言聖皇應錄受圖化象神明也改君馬黃為金靈運言聖皇踐祚致敬宗廟而孝道行於天下也改雉子班為於穆我皇言聖皇受禪德合神明也改聖人出為仲春振旅言大晉申文武之教改獵以時也改臨高臺為夏苗田言大晉改狩順時為苗除害也改遠如期為仲秋獮田言大晉雖有文德不廢武事順時以殺伐也改石留為順天道言仲冬大閱用武修文大晉之德配天也改務成爲唐堯言聖皇陟帝位德化光四表也玄雲依舊名言聖皇用人各盡其材也改黃爵行爲伯益言赤鳥銜書有周以興今聖皇受命神雀來也釣竿依舊名言聖皇德配堯舜又有呂望之佐濟大功致太平也其辭並列之於後云

靈之祥

靈之祥

石瑞章

旌金德

出西方

天降命

授宣皇

應期運

時龍驤

繼大舜

佐陶唐

讚文武

建帝綱

孟氏叛

據南疆

追有扈

亂五常

吳寇叛

蜀虜強

交誓盟

連遐荒

宣赫怒

奮鷹揚

震乾威

曜電光

陵九天

陷石城

梟逆命

拯有生

萬國安

四海寧

宣受命

應天機

風雲時動

神龍飛

禦葛亮

鎮雍梁

邊境安

夷夏康

務節事

勤定傾

攬英雄

保持盈

深穆穆

赫明明

沖而泰

天之經

養威重

運神兵

亮乃震斃

天下安寧

征遼東

敵失據

威靈邁日域

公孫既授首

羣逆破膽

咸震怖

朔北響應

海表景附

武功赫赫

德雲布

宣輔政

宣皇輔政

聖烈深

撥亂反正

順天心

網羅文武才

慎厥所生

所生賢

遺教施

安上治民

化風移

肇創帝基

洪業垂

於鑠明明

時赫戲

功濟萬世

定二儀

定二儀

雲行雨施

海外風馳

時運多難

時運多難

道教痛

天地變化

有盈虛

蠶爾吳蠻

武視江湖

我皇赫斯

致天誅

有征無戰

弭其圖

天威橫被

廓東隅

景龍飛

景龍飛

御天威

聰鑒玄察

動與神明協機

從之者顯

逆之者滅夷

文教敷

武功巍

弗違祥

享世永長

猛以致寬

道化光

赫明明

祚隆無疆

帝績惟期

有命既集

崇此洪基

平玉衡

平玉衡

糾姦回

萬國殊風

四海乖

禮賢養士

羈御英雄

思心齊

纂戎洪業

崇皇階

品物咸亨

聖敬日躋

聰鑒盡下情

明明綜天機

文皇統百揆

文皇統百揆

繼天理萬方

武將鎮四隅

英佐盈朝堂

謀言協秋蘭

清風發其芳

洪澤所漸潤

礫石為瑋璋

大道侔五帝 盛德踰三王 咸光大 上參天與地

至化無內外 無內外 六合並康乂 並康乂

邁茲嘉會 在昔羲與農 大晉德斯邁 鎮征及諸州

為藩衛 功濟四海 洪烈流萬世

因時運 聖策施 長蛇交解 羣桀離 勢窮奔吳

因時運 獸騎厲 惟武進 審大計 時邁其德 清一世

惟庸蜀 僭號天一隅 劉備逆帝命 禪亮承其餘

擁眾數十萬 闕隙乘我虛 驛騎進羽檄 天下不遑居

姜維屢寇邊 隴上為荒蕪 文皇愍斯民 歷世受罪辜

外謨藩屏臣 內謨眾士夫 爪牙應指受 腹心獻良圖

良圖協成文一作大興百萬軍 雷鼓震地起 猛勢陵浮雲

逋虜畏天誅 面縛造壘門 萬里同風教 逆命稱妾臣

光建五等 紀綱天人

天序 應受禪 承靈祐 御羣龍

天序歷 勒螭武 弘濟大化 英雋作輔 明明統萬機

赫赫鎮四方 咎繇稷契之疇 協蘭芳 禮王臣

覆兆民 化之如天與地 誰敢愛其身

大晉承運期 德隆聖皇 時清晏 白日垂光

大晉承運期 應籙圖 陟帝位 繼天正玉衡 化行象神明

至哉道隆虞與唐 元首敷洪化 百僚股肱並忠良



時太康

隆隆赫赫

福祚盈無疆

金靈運

金靈運

天符發

聖徵見

參日月

惟我皇

體神聖

受魏禪

應天命

皇之興

靈有徵

登大麓

御萬乘

皇之輔

若闕武

爪牙奮

莫之禦

皇之佐

讚清化

百事理

萬邦賀

神祇應

嘉瑞章

恭享禮

薦先皇

樂時奏

磬管鏘

鼓殷殷

鐘鐃鐃

奠樽俎

實玉觴

神歆饗

咸悅康

宴孫子

祐無疆

大孝蒸蒸

德教被萬方

於穆我皇

於穆我皇

盛德聖且明

受禪君世

光濟羣生

普天率土

莫不來庭

頤頤六合內

望風仰泰清

萬國雍雍

興頌聲

大化洽

地平而天成

七政齊

玉衡惟平

峨峨佐命

濟濟羣英

夙夜乾乾

萬機是經

雖治興

匪荒寧

謙道光

冲不盈

天地合德

日月同榮

赫赫煌煌

曜幽冥

三光克從

於顯天

垂景星

龍鳳臻

甘露宵零

肅神祇

祇上靈

萬物欣戴

自天效其成

仲春振旅

仲春振旅

大致人

武教於時日新

師執提

工執鼓

坐作起

節有序

盛矣允文允武

蒐田表禡

申法誓

遂圍禁

獻社祭

允以時

明國制

文武並用

禮之經

列車如戰

大教明

古今誰能去兵

大晉繼天

濟羣生

夏苗田

夏苗田

運將徂

軍國異容

文武殊

乃命羣吏

撰車徒

辯其號名

讚契書

王軍啓八門

行同上帝居

時路建大麾

雲旗翳紫虛

百官象其事

疾則疾

徐則徐

四衡旋軫

罷陣弊車

獻禽享祀

蒸蒸配有虞

惟大晉

德叅兩儀

化雲敷

仲秋彌田

仲秋彌田

金德常綱

涼風濤且厲

凝露結為霜

白藏司辰

倉隼時鷹揚

鷹揚猶尚父

順天以殺伐

春秋時序

雷霆震威曜

進退由鉦鼓

致禽祀祊

羽毛之用充軍府

赫赫大晉德

芬列陵三五

敷化以文

雖安不廢武

光宅四海

永享天之祐

順天道

順天道

握神契

三時不講武事

冬大閱

鳴鐻振鼓鐸

旌旗象虹霓

文制其中

武不窮武

動軍誓衆

禮成而義舉

三驅以崇仁

進止不失其序

兵卒練

將如闕武

惟闕武

氣陵青雲

解圍三面

殺不殄羣

偃旌麾

班六軍

獻享蒸

修典文

嘉大晉

德配天

祿報功

爵俟賢

饗燕樂

受百祿

壽萬年

唐堯

唐堯諮務成

謙謙德所興

積漸終光大

履霜致堅冰

神明道自成

一作然

河海猶可凝

舜禹統百揆

元凱以次升

禪讓應大歷

睿聖世相承

我皇陟帝位

平衡正準繩

德化飛四表

祥氣見其徵

興王坐俟旦

亡主恬自矜

致遠由近始

覆篲一作匱成山陵

披圖按先籍

有其證靈液

玄雲

玄雲起丘山

祥氣萬里會

龍飛何蜿蜿

鳳翔何翾翾

昔在唐虞朝

時見青雲際

今親遊萬國

流光溢天外

鶴鳴在後園

清音隨風邁

成湯隆顯命

伊摯來如飛

先天天不違

輟耕綜地綱

解褐衿天維

元功配二王

芬馨世所稀

我皇叙羣才

洪烈何巍巍

栢栢征四表

濟濟理萬機

神化感無方

髦才盈帝畿

丕顯惟昧旦

日新孔所諮

茂哉明聖德

日月同光輝

伯益

伯益佐舜禹

職掌山與川

德侔十六相

思心入無間

智理周萬物

下知衆鳥言

黃雀應清化

翔習何翩翩

和鳴棲庭樹

徘徊雲日間

夏桀爲無道

密網施山河

酷祝振織網

當奈黃雀何

殷湯崇天德

去其三面羅

逍遙羣飛來

鳴聲乃復和

朱雀作南宿

鳳凰統羽羣

赤鳥銜書至

天命瑞周文

神雀今來遊

爲我受命君

嘉祥致天和

膏澤隆青雲

蘭風發芳氣

蓋世同其芬

釣竿

釣竿何冉冉 甘飴芳且鮮 臨川運思心 微綸沈九泉  
太公寶此術 乃在靈秘篇 機變隨物移 精妙貫未然  
遊魚驚著釣 潛龍飛戾天 戾天安所至 撫翼翔太清  
太清一何異 兩儀出渾成 玉衡正三辰 造化賦羣形  
退願輔聖君 與神合其靈 我君弘遠略 天人不足并  
天人初并時 昧昧何茫茫 日月有徵兆 文象興二皇  
蚩尤亂生靈 黃帝用兵征萬方 逮夏禹而德衰  
三世不及虞與唐 我皇盛德配堯舜 受禪卽祚享天祥  
率土蒙祐 靡不肅 庶事康 穆穆明明 荷百祿  
保無極 永太平

輦舞未詳所起然漢代已施於燕享矣傳毅張衡所賦皆其事也  
舊曲有五篇一關東有賢女二章和二年中三樂久長四四方皇

五殿前生桂樹其辭並亡曹植輦舞詩序云故漢靈帝西園鼓吹  
有李堅者能輦舞遭世荒亂堅播越關西隨將軍段熲先帝聞其  
舊伎下書召堅堅年踰七十中間廢而不爲又古曲甚多謬誤異  
代之文未必相襲故依前曲作新歌五篇及秦始皇中又製其辭焉  
其舞故常二八栢玄將僭位尚書殿中郎袁明子啓增滿八佾泰  
始中歌辭今列之後云

洪業篇 當魏曲明明魏皇帝古曲關中有賢女

宣文創洪業	盛德在泰始	聖皇應靈符	受命君四海
萬國何所樂	上有明天子	唐堯禪帝位	虞舜惟恭已
恭已正南面	道化與時移	大赦盪萌漸	文教被黃支
象天則地	體無爲	聰明配日月	神聖參兩儀
雖有三凶類	靜言無所施	象天則地	體無爲

稷契並佐命 伊呂升王臣 闕芷登朝肆 下無失宿人  
聲發響自應 表立景來附 哮闕順羈制 潛龍升天路  
備物立成器 變通極其數 百事以時叙 萬機有常度  
訓之以克讓 納之以忠恕 羣下仰清風 海外同歡慕  
象天則地 化雲布 昔日貴彫飾 今尚儉與素  
昔日多纖介 今去情與故 象天則地 化雲布  
濟濟大朝士 夙夜綜萬機 萬機無廢理 明明降訓詔  
臣譬列星景 君配朝日輝 事業並通濟 功烈何巍巍  
五帝繼三皇 三皇世所歸 聖德應期運 天地不能違  
仰之彌已高 猶天不可階 將復御龍氏 鳳凰在庭棲  
天命篇 當魏曲太和有聖帝古曲章和二年中  
聖祖受天命 應期輔魏皇 入則綜萬機 出則征四方

朝廷無遺理 方表寧且康 道隆舜臣堯 積德踰太王  
孟度阻窮險 造亂天一隅 神兵出不意 奉命致天誅  
赦善罰有罪 元惡宗爲虛 威風震勁蜀 武烈懾強吳  
諸葛不知命 肆逆亂天常 擁徒十餘萬 數來寇邊疆  
我皇邁神武 執鉞鎮雍涼 亮乃畏天威 未戰先仆僵  
盈虛自然運 時變故多艱 東征陵海表 萬里克朝鮮  
受遺齊七政 曹爽又滔天 羣凶受誅殛 百祿咸來臻  
黃華應福始 王浚爲禍先  
景皇篇 當魏曲魏歷長古曲樂久長  
景皇帝 聰明命世生 盛德參天地 帝王道大  
創基旣已難 繼世亦未易 外有夏侯玄 內則張與李  
三凶構逆 亂帝紀 順天行誅 窮其姦宄

邊將禦其漸 潛謀不得起 罪人咸伏辜 威風振萬里  
平衡綜萬機 萬機無不理 召陵恒不君 內外何紛紛  
衆小便成羣 蒙昧恣心 治亂不分 獻聖獨斷  
濟武常以文 順天惟廢立 掃霓披浮雲 雲霓既已闢  
清和未幾閒 羽檄首尾至 變起東南藩 儉欽爲長虵  
外則憑吳蠻 萬國紛騷擾 戚戚天下懼不安 神武御六軍  
我皇執鉞征 儉欽起壽春 前鋒據項城 出其不意  
並縱竒兵 竒兵誠難御 廟勝實難支 兩軍不期遇  
敵退計無施 豹騎惟武進 大戰沙陽陂 欽乃亡魂走  
奔虜若雲披 天因赦有罪 東土效鯨鯢

大晉篇

當魏曲天生蒸民古曲四方皇

赫赫大晉

於穆文王

蕩蕩巍巍

道邁陶唐

世稱三皇五帝 及今重其光 九德克明 文旣顯武又彰  
思弘六合 兼濟萬方 內舉元凱 朝政以綱  
外簡武臣 時惟鷹揚 靡順不懷 逆命斯亡  
仁配春日 威踰秋霜 濟濟多士 同茲蘭芳  
唐虞至治 四凶滔天 致討儉欽 罔不肅虔  
化感海內 海外來賓 獻其聲樂 並稱妾臣  
西蜀猾夏 僭號方域 命將致討 委國稽服  
吳人放命 馮海阻江 飛書告喻 響應來同  
先王建萬國 九服爲藩衛 亡秦壞諸侯 序祚不二世  
歷代不能復 忽踰五百歲 我皇邁聖德 應期創典制  
分土五等 藩國正封界 莘莘文武佐 千秋邁嘉會  
洪澤溢區內 仁風翔海外

明君篇

當魏曲為君既不易古曲殿前生桂樹

明君御四海

聽鑒盡物情

顧望有譴罰

竭忠身必榮

蘭芷出荒野

萬里升紫庭

茨草穢堂階

掃截不得生

能否莫相蒙

百官正其名

恭已慎有為

有為無不成

闇君不自信

羣下執異端

正直羅浸潤

姦臣奪其權

雖欲盡忠誠

結舌不敢言

結舌亦何憚

盡忠為身患

清流豈不潔

飛塵濁其源

歧路令人迷

未遠勝不還

忠臣立君朝

正色不顧身

邪正不並存

譬若胡與秦

胡秦有合時

邪正各異津

忠臣遇明君

乾乾惟日新

羣目統在綱

眾星共北辰

設令遭闇主

斥退為凡人

雖薄供時用

白茅猶為珍

冰霜晝夜結

蘭桂摧為薪

邪臣多端變

用心何委曲

便辟順情指

動隨君所欲

偷安樂目前

不問清與濁

積偽罔時主

養交以持祿

言行恒相違

難饜甚谿谷

昧死則一作射乾沒

覺露則滅族

拂舞出自江左舊云吳舞檢其歌非吳辭也亦陳於殿庭楊泓序云自到江南見白符舞或言白鳧鳩舞云有此來數十年矣察其辭旨乃是吳人患孫皓虐政思屬晉也今列之於後云

拂舞歌詩五篇

白鳩篇

翩翩白鳩

再飛再鳴

懷我君德

來集君庭

白雀呈瑞

素羽明鮮

翔庭舞翼

以應仁乾

皎皎鳴鳩

或丹或黃

樂我君惠

振羽來翔

東壁餘光

魚在江湖

惠而不費

敬我微驅

策我良駟

習我驅馳

與君周旋

樂道忘饑

我心虛靜

我志霑濡

彈琴鼓瑟

聊以自娛

陵雲登臺

浮遊太清 攀龍附鳳 自望身輕  
濟濟篇

暢暢飛舞 氣流芳 追念三五 大綺黃 去失有

時可行 去來時同 此未央 時冉冉 近桑榆

但當飲酒 為歡娛 衰老逝 何有期 多憂耿耿

內懷思 深地曠 魚獨希 願得黃浦 眾所依

恩感人 世無比 悲歌且舞 無極已

獨獨祿祿 水深泥濁 泥濁尚可 水深殺我 雍雍雙鴈

遊戲田畔 我欲射鴈 念子孤散 翩翩浮萍 得風搖輕

我心何合 與之同并 空牀低幃 誰知無人 夜衣錦繡

誰別偽真 刀鳴箭中 倚牀無施 父冤不報 欲活何為

猛獸班班 遊戲山間 獸欲嚙人 不避豪賢

碣石篇

東臨碣石 以觀滄海 水河淡淡 山島竦峙 樹木叢生

百草豐茂 秋風蕭瑟 洪波涌起 日月之行 若出其中

星漢燦爛 若出其裏 幸甚至哉 歌以詠志 觀滄海

孟冬十月 北風徘徊 天氣肅清 繁霜霏霏 鷓鴣晨鳴

鴈過南飛 鷺鳥潛藏 熊羆窟棲 釋罇停置 農收積場

逆旅整設 以通賈商 幸甚至哉 歌以詠志 冬十月

鄉土不同 河朔隆寒 流澌浮漂 舟船行難 雖不入地

豐籟深奧 水竭不流 冰堅可蹈 士隱者貧 勇俠輕非

心常歎怨 戚戚多悲 幸甚至哉 歌以詠志 土不同

神龜雖壽 猶有竟時 騰蛇乘霧 終為土灰 驥老伏櫪



志在千里 烈士暮年 壯心不已 盈縮之期 不但在天  
養怡之福 可得永年 幸甚至哉 歌以詠志 龜雖壽

淮南王篇

淮南王

自言尊

百尺高樓

與天連

後園鑿井

銀作牀

金瓶素纒

汲寒漿

汲寒漿

飲少年

少年窈窕

何能賢

揚聲悲歌

音絕天

我欲渡河

河無梁

願作雙黃鵠

還故鄉

還故鄉

入故里

徘徊故鄉

苦身不已

繁舞竒歌

無不泰

徘徊桑梓

遊天外

鼓角橫吹曲鼓按周禮以鼗鼓軍事角說者云蚩尤氏帥魍魎與黃帝戰於涿鹿帝乃命始吹角為龍鳴以禦之其後魏武北征烏丸越沙漠而軍士思歸於是減為中鳴而尤更悲矣

胡角者本以應胡笳之聲後漸用之橫吹有雙角卽胡樂也張博望入西域傳其法於西京惟得摩訶兜勒一曲李延年因胡曲更造新聲二十八解乘輿以為武樂後漢以給邊和帝時萬人將軍得之魏晉以來二十八解不復具存用者有黃鵠壘頭出關入關出塞入塞折楊柳黃覃子赤之楊望行人十曲按魏晉之世有孫氏善弘舊曲宋識善擊節唱和陳左善清歌列和善吹笛郝索善彈箏朱生善琵琶尤發新聲故傅玄著書曰人若欽所聞而忽所見不亦惑乎設此六人生於上世越今古而無儷何但夔牙同契哉按此說則自茲以後皆孫朱等之遺則也  
相和漢舊歌也絲竹更相和執節者歌本一部魏明帝分為二更遮夜宿本十七曲朱生宋識列和等復合之為十三曲  
但歌四曲自漢世無絃節作伎最先唱一人唱三人和魏武帝尤

好之時有宋容華者清徹好聲善唱此曲當時之特妙自晉以來不復傳遂絕

凡樂章古辭今之存者並漢世街陌謠謳江南可採蓮烏生十五子白頭吟之屬也吳歌雜曲並出江南東晉以來稍有增廣

子夜歌者女子名子夜造此聲孝武太元中琅邪王軻之家有鬼歌子夜則子夜是此時人也

鳳將雛歌者舊曲也應璩百一詩云言是鳳將雛然則其來久矣前漢歌者車騎將軍沈充所制

阿子及懽聞歌者穆帝升平初歌畢輒呼阿子汝聞不語在五行志後人衍其聲以爲此二曲

團扇歌者中書令王珉與嫂婢有情愛好甚篤嫂捶撻婢過苦婢素善歌而珉好捉白團扇故制此歌

懊懽歌者隆安初俗聞訛謠之曲語在五行志長史變者司徒左長史王廞臨敗所制

凡此諸曲始皆徒歌旣而被之絃管又有因絲竹金石造歌以被之魏世三調歌辭之類是也

杯柈舞按太康中天下爲晉世寧舞移手以一作按杯柈反覆之此則漢世惟有柈舞而晉加以杯反覆之也

公莫舞今之巾舞也相傳云項莊劍舞項伯以袖隔之使不得害漢高祖且語項莊云公莫古人相呼曰公言公莫害漢王也今之用巾蓋像項伯衣袖之遺式然按琴操有公莫渡河曲然則其聲所從來已久俗云項伯非也

白紵舞按舞辭有巾袍之言紵本吳地所出宜是吳舞也晉俳歌又云皎皎白緒節節爲雙吳音呼緒爲紵疑白紵卽白緒也

鐸舞歌一篇幡舞歌一篇鼓舞伎六曲並陳於元會後漢正旦天子臨德陽殿受朝賀舍利從西方來戲於殿前激水化成比目魚跳躍嗽水作霧翳日畢又化成龍長八九丈出水遊戲炫耀日光以兩大絲繩繫兩柱頭相去數丈兩倡女對舞行於繩上相逢切肩而不傾魏晉訖江左猶有夏育扛鼎巨象行乳神龜拊舞背負靈嶽桂樹白雪畫地成川之樂

成帝咸康七年尚書蔡謨奏八年正會儀注惟作鼓吹鐘鼓其餘伎樂盡不作侍中張澄給事黃門侍郎陳逵駁以爲王者觀時設教至於吉凶殊斷不易之道也今四方觀禮陵有儂弔之位庭奏宮懸之樂二禮兼用哀樂不分體國經制莫大於此詔曰今旣以天下體大禮從權宜三正之響宜盡用吉禮也至娛耳目之樂所不忍聞故闕之耳事之大者不過上壽酒稱萬歲已許其大不足

復闕鐘鼓鼓吹也澄達又啓今大禮雖降事吉於朝然儂弔顯於園陵則未滅有哀禮服定於典文義無盡吉是以咸寧之會有徹樂之典實先朝稽古憲章垂式萬世者也詔曰若元日大饗萬國朝宗庭廢鐘鼓之奏遂闕起居之節朝無磬制之音賓無蹈履之度其於事義不亦闕乎惟可量輕重以制事中散騎侍郎顧臻表曰臣聞聖王制樂讚揚政道養以仁義防其淫佚上享宗廟下訓元體五行之正音協八風以陶物宮聲正方而好義角聲堅齊而率禮絃歌鍾鼓金石之作備矣故通神至化有率舞之感移風易俗致和樂之極末世之伎設禮外之觀逆行連倒頭足入筓之屬皮膚外剝肝心內摧敦彼行葦猶謂勿踐矧伊生靈而不惻愴加四海朝覲言觀帝庭耳聆雅頌之聲目覩威儀之序足以蹋天頭以履地反天地之至順傷彝倫之大方今夷狄對岸外禦爲急兵

食七升忘身赴難過泰之戲日廩五斗方掃神州經略中甸若此  
之事不可示遠宜下太常纂備雅樂簫韶九成惟新於盛運功德  
頌聲永著于來葉此乃所以燕及皇天克昌厥後者也諸伎而傷  
人者皆宜除之流簡儉之德邁康哉之詠清風既行下應如草此  
之謂也愚管之誠惟垂採察於是除高緝紫鹿跂行鼈食及齊王  
捲衣笮兒等樂又減其廩其後復尚一無尚字高緝紫鹿焉

晉書二十三

志第十三

終

魏川中鳳園  
氏圖南南甫

晉書二十四

志第十四

魏川中鳳園  
氏圖南南甫

### 職官

書曰唐虞稽古建官惟百所以獎導民萌裁成庶政易曰天垂象  
聖人則之執法在南宮之右上相處端門之外而鳥龍居位雲火  
垂名前史詳之其以尚矣黃帝置三公之秩以親黎元少昊配九  
扈之名以爲農正命重黎於天地詔融冥於水火則可得而言焉  
伊尹曰三公調陰陽九卿通寒暑大夫知人事列士去其私而成  
湯居亳初置二相以伊尹仲虺爲之凡厥樞會仰承君命總及周  
武下車成康垂則六卿分職二公弘化成樹司存各題標準苟非  
其道入弗虛榮貽厥孫謀其固本也如此及秦變周官漢遵嬴舊  
或隨時適用或因務遷革霸王之典義在於斯旣獲厥安所謂得

其時制者也四征興於漢代四安起於魏初四鎮通於柔遠四平止於喪亂其渡遼凌江輕車強弩式揚遐外用表攻伐興而復毀厥號彌繁及當塗得志剋平諸夏初有軍師祭酒叅掌戎律建安十三年罷漢台司更置丞相而以曹公居之用兼端揆孫吳劉蜀多依漢制雖復臨時命氏而無忝舊章世祖武皇帝卽位之初以安平王孚爲太宰鄭沖爲太傅王祥爲太保司馬望爲太尉何曾爲司徒荀顛爲司空石苞爲大司馬陳騫爲大將軍世所謂八公同辰攀雲附翼者也若乃成乎棟宇非一枝之勢處乎經綸稱萬夫之敵或牽羊以叶於夢或垂釣以申其道或空桑以獻其術或捺版以啓其心臥龍飛鴻方金擬壁秦奚鄭產楚材晉用斯亦曩時之良具其又昭彰者焉宣王旣誅曹爽政由已出網羅英俊以備天官及蘭卿受羈貴公顯戮雖復策名魏氏而乃心皇晉及文

王纂業初啓晉臺始置二衛有前驅養由之弩及設三部有熊渠伏飛之衆是以武帝龍飛乘茲奮翼猶武王以周之十亂而理殷民者也是以泰始盡於太康喬柯茂葉來居斯位自大興訖于建元南金北銑用處茲秩雖未擬乎夔拊龍言天工人代亦庶幾乎任官惟賢蒞事惟能者也

丞相相國並秦官也晉受魏禪並不置自惠帝之後省置無恒爲之者趙王倫梁王彤成都王穎南陽王保王敦王導之徒皆非復尋常人臣之職

太宰太傅太保周之三公官也魏初唯置太傅以鍾繇爲之末年又置太保以鄭沖爲之晉初以景帝諱故又採周官官名置太宰以代太師之任秩增三司與太傅太保皆爲上公論道經邦燮理陰陽無其人則闕以安平獻王孚居之自渡江以後其名不替而

居之者甚寡

太尉司徒司空並古官也自漢歷魏置以爲三公及晉受命迄江左其官相承不替

大司馬古官也漢制以冠大將軍驃騎車騎之上以代太尉之職故恒與太尉迭置不並列及魏有太尉而大司馬大將軍各自爲官位在三司上晉受魏禪因其制以安平王孚爲太宰鄭沖爲太傅王祥爲太保義陽王望爲太尉何曾爲司徒荀顛爲司空石苞爲大司馬陳騫爲大將軍凡八公同時並置唯無丞相焉自義陽王望爲大司馬之後定令如舊在三司上

大將軍古官也漢武帝置冠以大司馬名爲崇重之職及漢東京大將軍不常置爲之者皆擅朝權至景帝爲大將軍亦受非常之任後以叔父孚爲太尉奏改大將軍在太尉下及晉受命猶依其制位次三司下後復舊在三司上太康元年琅邪王伉遷大將軍復制在三司下伉薨後如舊

開府儀同三司漢官也殤帝延平元年鄧騭爲車騎將軍儀同三司儀同之名始自此也及魏黃權以車騎將軍開府儀同三司開府之名起於此也

驃騎車騎衛將軍伏波撫軍都護鎮軍中軍四征四鎮龍驤典軍上軍輔國等大將軍左右光祿光祿三大夫開府者皆爲位從公太宰太傅太保司徒司空左右光祿大夫光祿大夫開府位從公者爲文官公冠進賢三梁黑介幘

大司馬大將軍太尉驃騎車騎衛將軍諸大將軍開府位從公者爲武官公皆著武冠平上黑幘

文武官公皆假金章紫綬著五時服其相國丞相皆袞窵綠蓋綬

所以殊於常公也

諸公及開府位從公者品秩第一食奉日五斛太康二年又給絹春百匹秋絹二百匹絲二百斤元康元年給菜田十頃騶十人立夏後不及田者食奉一年置長史一人秩千石西東閣祭酒西東曹掾戶倉賊曹令史屬各一人御屬閣下令史西東曹倉戶賊曹令史門令史記室省事令史閣下記室書令史西東曹學事各一人給武賁二十人持班劍給朝車駕駟安車黑耳駕三各一乘祭酒掾屬白蓋小車七乘輜車施耳後戶阜輪犢車各一乘自祭酒已下令史已上皆阜零辟朝服太尉雖不加兵者吏屬皆絳服司徒加置左右長史各一人秩千石主簿左西曹掾屬各一人西曹稱右西曹其左西曹令史已下人數如舊令司空加置導橋掾一人諸公及開府位從公加兵者增置司馬一人秩千石從事中

郎二人秩比千石主簿記室督各一人舍人四人兵鎧士曹營軍刺姦帳下都督外都督令史各一人主簿已下令史已上皆絳服司馬給吏卒如長史從事中郎給侍二人主簿記室督各給侍一人其餘臨時增崇者則褒加各因其時爲節文不爲定制

諸公及開府位從公爲持節都督增參軍爲六人長史司馬從事中郎主簿記室督祭酒掾屬舍人如常加兵公制

特進漢官也二漢及魏晉以加官從本官車服無吏卒太僕羊琇遜位拜特進加散騎常侍無餘官故給吏卒車服其餘加特進者唯食其祿賜位其班位而已不別給特進吏卒車服後定令特進品秩第二位次諸公在開府驃騎上冠進賢兩梁黑介幘五時朝服佩水蒼玉無章綬食奉日四斛太康二年始賜春服絹五十匹秋絹百五十匹絲一百五十斤元康元年給菜田八頃田騶八人

立夏後不及田者食奉一年置主簿功曹史門亭長門下書佐各一人給安車黑耳駕御一人輜車施耳後戶一乘

左右光祿大夫假金章紫綬光祿大夫加金章紫綬者品秩第二祿賜班位冠幘車服佩玉置吏卒羽林及卒諸所賜給皆與特進同其以爲加官者唯假章綬祿賜班位而已不別給車服吏卒也又卒贈此位本已有卿官者不復重給吏卒其餘皆給

光祿大夫假銀章青綬者品秩第三位在金紫將軍下諸卿上漢時所置無定員多以爲拜假贈之使及監護喪事魏氏已來轉復優重不復以爲使命之官其諸公告老者皆家拜此位及在朝顯職復用加之及晉受命仍舊不改復以爲優崇之制而諸公遜位不復加之或更拜上公或以本封食公祿其諸卿尹中朝大官年老致仕者及內外之職如此者前後甚衆由是或因得開府或

進加金章紫綬又復以爲禮贈之位泰始中唯太子詹事楊珧加給事中光祿大夫加兵之制諸所供給依三品將軍其餘自如舊制終武惠孝懷三世

光祿大夫與卿同秩中二千石著進賢兩梁冠黑介幘五時朝服佩水蒼玉食奉日三斛太康二年始給春賜絹五十匹秋絹百匹絲百斤惠帝元康元年始給菜田六頃田騶六人置主簿功曹史門亭長門下書佐各一人

驃騎已下及諸大將軍不開府非持節都督者品秩第二其祿與特進同置長史司馬各一人秩千石主簿功曹史門下督錄事兵鎧士賊曹營軍刺姦帳下都督功曹書佐門吏門下書吏各一人其假節爲都督者所置與四征鎮加大將軍不開府爲都督者同四征鎮安平加大將軍不開府持節都督者品秩第二置叅佐吏



卒幕府兵騎如常都督制唯朝會祿賜從二品將軍之例然則持節都督無定負前漢遣使始有持節光武建武初征伐四方始權時置督軍御史事竟罷建安中魏武爲相始遣大將軍督之二十一年征孫權還夏侯惇督二十六軍是也魏文帝黃初三年始置都督諸州軍事或領刺史又上軍大將軍曹真都督中外諸軍事假黃鉞則總統內外諸軍矣魏明帝太和四年秋宣帝征蜀加號大都督高貴鄉公正元二年文帝都督中外諸軍尋加大都督及晉受禪都督諸軍爲上監諸軍次之督諸軍爲下使持節爲上持節次之假節爲下使持節得殺二千石以下持節殺無官位人若軍事得與使持節同假節唯軍事得殺犯軍令者江左以來都督中外尤重唯王導等權重者乃居之

三品將軍秩中二千石者著武冠平上黑幘五時朝服佩水蒼玉食奉春秋賜綵絹菜田田騶如光祿大夫諸卿制置長史司馬各一人秩千石主簿功曹門下都督錄事兵鎧士賊曹營軍刺姦吏帳下都督功曹書佐門吏門下書吏各一人

錄尚書案漢武時左右曹諸吏分平尚書奏事知樞要者始領尚書事張安世以車騎將軍霍光以大將軍王鳳以大司馬師丹以左將軍並領尚書事後漢章帝以太傅趙熹太尉牟融並錄尚書事尚書有錄名蓋自熹融始亦西京領尚書之任猶唐虞大麓之職也和帝時太尉鄧彪爲太傅錄尚書事位上公在三公上漢制遂以爲常每少帝立則置太傅錄尚書事猶古冢宰總已之義薨輒罷之自魏晉以後亦公卿權重者爲之

尚書令秩千石假銅印墨綬冠進賢兩梁冠納言幘五時朝服佩水蒼玉食奉月五十斛受拜則策命之以在端右故也太康二年

始給賜絹春三十匹秋七十匹絲七十斤元康元年始給菜田六頃田騶六人立夏後不及田者食奉一年始賈充爲尚書令以目疾表置省事吏四人省事蓋自此始

僕射服秩印綬與今同案漢本置一人至漢獻帝建安四年以執金吾榮邵爲尚書左僕射僕射分置左右蓋自此始經魏至晉迄於江左省置無恒置二則爲左右僕射或不兩置但曰尚書僕射今闕則左爲省主若左右並闕則置尚書僕射以主左事

列曹尚書案尚書本漢承秦置及武帝遊宴後庭始用宦者主中書以司馬遷爲之中間遂罷其官以爲中書之職至成帝建始四年罷中書宦者又置尚書五人一人爲僕射而四人分爲四曹通掌圖書秘記章奏之事各有其任其一曰常侍曹主丞相御史公卿事其二曰二千石曹主刺史郡國事其三曰民曹主吏民上書

事其四曰主客曹主外國夷狄事後成帝又置三公曹主斷獄是爲五曹後漢光武以三公曹主歲盡考課諸州郡事改常侍曹爲吏部曹主選舉祠祀事民曹主繕修功作鹽池園苑死事客曹主護駕羗胡朝賀事二千石曹主辭訟事中都官曹主水火盜賊事合爲六曹并令僕二人謂之八座尚書雖有曹名不以爲號靈帝以侍中梁鵠爲選部尚書於此始見曹名及魏改選部爲吏部主選部事又有左民客曹五兵度支凡五曹尚書二僕射一令爲八座及晉置吏部三公客曹駕部屯田度支六曹而無五兵咸寧二年省駕部尚書四年省一僕射又置駕部尚書太康中有吏部殿中及五兵田曹度支左民爲六曹尚書又無駕部三公客曹惠帝世又有右民尚書止於六曹不知此時省何曹也及渡江有吏部祠部五兵左民度支五尚書祠部尚書常與右僕射通職不恒置以

右僕射攝之若右僕射闕則以祠部尚書攝知右事

左右丞自漢武帝建始四年置尚書而便置丞四人及光武始減其二唯置左右丞左右丞蓋自此始也自此至晉不改晉左丞主臺內禁令宗廟祠祀朝儀禮制選用署吏急假右丞掌臺內庫藏廬舍凡諸器用之物及廩振人租布刑獄兵器督錄遠道文書章表奏事八座郎初拜皆沿漢舊制並集都座交禮遷職又解交焉尚書郎西漢舊置四人以分掌尚書其一人主匈奴單于營部一人主羗夷吏民一人主戶口墾田一人主財帛委輸及光武分尚書爲六曹之後合置三十四人秩四百石并左右丞爲三十六人郎主作文書起草更直五日於建禮門內尚書郎初從三署詣臺試守尚書郎中歲滿稱尚書郎三年稱侍郎選有吏能者爲之至魏尚書郎有殿中吏部駕部金部虞曹比部南主客祠部度支庫

部農部水部儀曹三公倉部民曹二千石中兵外兵都兵別兵考功定課凡二十三郎青龍二年尚書陳矯奏置都官騎兵合凡二十五郎每一郎缺白試諸孝廉能結文案者五人謹封奏其姓名以補之及晉受命武帝罷農部定課置直事殿中祠部儀曹吏部三公比部金部倉部度支都官二千石左民右民虞曹屯田起部水部左右主客駕部車部庫部左右中兵左右外兵別兵都兵騎兵左右士北主客南主客爲三十四曹郎後又置運曹凡三十五曹置郎二十三人更相統攝及江左無直事右民屯田車部別兵都兵騎兵左右事運曹十曹郎康穆以後又無虞曹二千石二郎但有殿中祠部吏部儀曹三公比部金部倉部度支都官左民起部水部主客駕部庫部中兵外兵十八曹郎後又省主客起部水部餘十五曹云

侍中案黃帝時風后爲侍中於周爲常伯之任秦取古名置侍中漢因之秦漢俱無定員以功高者一人爲僕射魏晉以來置四人別加官者則非數掌儉贊威儀大駕出則次直侍中護駕正直侍中負璽陪乘不帶劍餘皆騎從御登殿與散騎常侍對扶侍中居左常侍居右備切問近對拾遺補闕及江左哀帝興寧四年栢溫奏省二人後復舊

給事黃門侍郎秦官也漢已後並因之與侍中俱管門下衆事無員及晉置員四人

散騎常侍本秦官也秦置散騎又置中常侍散騎騎從乘輿車後中常侍得入禁中皆無員亦以爲加官漢東京初省散騎而中常侍用宦者魏文帝黃初初置散騎合之於中同掌規諫不典事貂璫插右騎而散從至晉不改及元康中惠帝始以宦者董猛爲中

常侍後遂止常爲顯職

給事中秦官也所加或大夫博士議郎掌顧問應對位次中常侍漢因之及漢東京省魏世復置至晉不改在散騎常侍下給事黃門侍郎上無員

通直散騎常侍案魏末散騎常侍又有在員外者泰始十年武帝使二人與散騎常侍通員直故謂之通直散騎常侍江左置四人員外散騎常侍魏末置無員

散騎侍郎四人魏初與散騎常侍同置自魏至晉散騎常侍侍郎與侍中黃門侍郎共平尚書奏事江左乃罷

通直散騎侍郎四人初武帝置員外散騎侍郎及太興元年元帝使二人與散騎侍郎通員直故謂之通直散騎侍郎後增爲四人員外散騎侍郎武帝置無員

奉朝請本不爲官無員漢東京罷三公外戚宗室諸侯多奉朝請奉朝請者奉朝會請召而已武帝亦以宗室外戚爲奉車駙馬駙馬都尉行參軍舍人爲騎都尉皆奉朝請後罷奉車騎二都尉唯留駙馬都尉奉朝請諸尚公主者劉惔桓溫皆爲之

中書監及令案漢武帝遊宴後庭始使宦者典事尚書謂之中書謁者置令僕射成帝改中書謁者令曰中謁者令罷僕射漢東京省中謁者令而有中官謁者令非其職也魏武帝爲魏王置秘書令典尚書奏事文帝黃初初改爲中書置監令以秘書左丞劉放爲中書監右丞孫資爲中書令監令蓋自此始也及晉因之並置員一無一人

中書侍郎魏黃初初中書旣置監令又置通事郎次黃門郎黃門

郎已署事過通事乃署名已署奏以入爲帝省讀書可及晉改曰中書侍郎員四人中書侍郎蓋此始也及江左初改中書侍郎曰通事郎尋復爲中書侍郎

中書舍人案晉初初置舍人通事各十人江左令舍人通事謂之通事舍人掌呈奏案後省而以中書侍郎一人直西省又掌詔命秘書監案漢桓帝延熹三年置秘書監後省魏武爲魏王置秘書令丞及文帝黃初初置中書令典尚書奏事而秘書改令爲監後以何禎爲秘書丞而秘書先自有丞乃以禎爲秘書右丞及晉受命武帝以秘書并中書省其秘書著作之局不廢惠帝永平中復置秘書監其屬官有丞有郎并統著作省

著作郎周左史之任也漢東京圖籍在東觀故使名儒著作東觀有其名尚未有官魏明帝太和中詔置著作郎於此始有其官隸

中書省及晉受命武帝以繆徵爲中書著作郎元康二年詔曰著作舊屬中書而秘書旣典文籍今改中書著作爲秘書著作於是改隸秘書省後別自置省而猶隸秘書著作郎一人謂之大著作郎專掌史任又置佐著作郎八人著作郎始到職必撰名臣傳一人

太常光祿勳衛尉太僕廷尉大鴻臚宗正大司農少府將作大匠太后三卿大長秋皆爲列卿各置丞功曹主簿五官等員

太常有博士協律校尉員又統大學諸博士祭酒及太史太廟太樂鼓吹陵等令太史又別置靈臺丞

太常博士魏官也魏文帝初置晉因之掌引導乘輿王公已下應追謚者則博士議定之

協律校尉漢協律都尉之職也魏杜夔爲之及晉改爲協律校尉

晉初承魏制置博士十九人及咸寧四年武帝初立國子學定置國子祭酒博士各一人助教十五人以教生徒博士皆取履行清淳通明典義者若散騎常侍中書侍郎太子中庶子以上乃得召試及江左初減爲九人元帝末增儀禮春秋公羊博士各一人合爲十一人後又增爲十六人不復分掌五經而謂之太學博士也孝武太元十年損國子助教員爲十人光祿勳統武賁中郎將羽林郎將冗從僕射羽林左監五官左右中郎將東園匠太官御府守宮黃門掖庭清商華林園暴室等令哀帝興寧二年省光祿勳并司徒孝武寧康元年復置

衛尉統武庫公車衛士諸冶等令左右都候南北東西督治掾及渡江省衛尉

太僕統典農典虞都尉典虞丞左右中典牧都尉車府典牧乘黃

廐驂騮廐龍馬廐等令典牧又別置羊牧丞太僕自元帝渡江之後或省或置太僕省故驂騮爲門下之職

廷尉主刑法獄訟屬官有正監評并有律博士員

大鴻臚統大行典客園池華林園鈞盾等令又有青官列丞鄴玄武苑丞及江左有事則權置無事則省

宗正統皇族宗人圖謀又統太醫令史又有司牧掾員及渡江哀帝省并太常太醫以給門下省

大司農統大輦導官二令襄國都水長東西南北部護漕掾及渡江哀帝省并都水孝武復置

少府統材官校尉中左右三尚方中黃左右藏左校甄官平準奚官等令左校坊鄴中黃左右藏油官等丞及渡江哀帝省平丹楊尹孝武復置自渡江唯置一尚方又省御府

將作大匠有事則置無事則罷

太后三卿衛尉少府太僕漢置皆隨太后宮爲官號在同名卿上無太后則闕魏改漢制在九卿下及晉復舊在同號卿上

大長秋皇后卿也有后則置無后則省

御史中丞本秦官也秦時御史大夫有二丞其一御史丞其一爲中丞中丞外督部刺史內領侍御史受公卿奏事舉劾按章漢因之及成帝綏和元年更名御史大夫爲大司空置長史而中丞官職如故哀帝建平二年復爲御史大夫元壽二年又爲大司空而中丞出外爲御史臺主歷漢東京至晉因其制以中丞爲臺主治書侍御史案漢宣帝幸宣室齋居而決事令侍御史二人治書侍側後因別置謂之治書侍御史蓋其始也及魏又置治書執法掌奏劾而治書侍御史掌律令二官俱置及晉唯置治書侍御史

負四人泰始四年又置黃沙獄治書侍御史一人秩與中丞同掌詔獄及廷尉不當者皆治之後并河南遂省黃沙治書侍御史及太康中又省治書侍御史二員

侍御史案二漢所掌凡有五曹一曰令曹掌律令二曰印曹掌刻印三曰供曹掌齋祠四曰尉馬曹掌廐馬五曰乘曹掌護駕魏置八人及晉置員九人品同治書而有十三曹吏曹課第曹直事曹印曹中都督曹外都督曹媒曹符節曹水曹中壘曹營軍曹法曹算曹及江左初省課第曹置庫曹掌廐牧牛馬市租後分曹置外左庫內左庫云

殿中侍御史案魏蘭臺遣二御史居殿中伺察非法卽其始也及晉置四人江左置二人又案魏晉官品令又有禁防御史第七品孝武太元中有檢校御史吳琨則此二職亦蘭臺之職也符節御

御史中丞掌授節銅武符竹使符及泰始九年武帝省并蘭臺置符節御史掌其事焉

司隸校尉案漢武初置十三州刺史各一人又置司隸校尉察三輔三河弘農七郡歷漢東京及魏晉其官不替屬官有功曹都官一作官從事諸曹從事部郡從事主簿錄事門下書佐省事記室書佐諸曹書佐守從事武猛從事等員凡吏一百人卒三十二人及渡江乃罷司隸校尉官其職乃揚州刺史也

謁者僕射秦官也自漢至魏因之魏置僕射掌大拜授及百官班次統謁者十人及武帝省僕射以謁者并蘭臺江左復置僕射後又省

都水使者漢水衡之職也漢又有都水長丞主陂池灌溉保守河



渠屬太常漢東京省都水置河隄謁者魏因之及武帝省水衡置都水使者一人以河隄謁者爲都水官屬及江左省河隄謁者置謁者六人

中領軍將軍魏官也漢建安四年魏武丞相府自置及拔漢中以曹休爲中領軍文帝踐祚始置領軍將軍以曹休爲之主五校中壘武衛等三營武帝初省使中軍將軍羊祜統二衛前後左右驍衛等營卽領軍之任也懷帝永嘉中改中軍曰中領軍永昌元年改曰北軍中候尋復爲領軍成帝世復爲中候尋復爲領軍

護軍將軍案本秦護軍都尉官也漢因之高祖以陳平爲護軍中尉武帝復以爲護軍都尉屬大司馬魏武爲相以韓浩爲護軍史良爲領軍非漢官也建安十二年改護軍爲中護軍領軍爲中領軍置長史司馬魏初因置護軍將軍主武官選隸領軍晉世則不

隸也元帝永昌元年省護軍并領軍明帝太寧二年復置領護各領營兵江左以來領軍不復別領營總統二衛驍騎材官諸營護軍猶別有營也資重者爲領軍護軍資輕者爲中領軍中護軍屬官有長史司馬功曹主簿五官受命出軍則置叅軍

左右衛將軍案文帝初置中衛及魏武帝受命分爲左右衛以羊琇爲左趙序爲右並置長史司馬功曹主簿員江左罷長史

驍騎將軍遊擊將軍並漢雜號將軍也魏置爲中軍及晉以領護左右衛驍騎遊擊爲六軍

左右前後軍將軍案魏明帝時有左軍則左軍魏官也至晉不改武帝初又置前軍右軍恭始八年又置後軍是爲四軍

屯騎步兵越騎長水射聲等校尉是爲五校並漢官也魏晉逮于江左猶領營兵並置司馬功曹主簿後省左軍右軍前軍後軍爲

鎮衛軍其左右營校尉自如舊皆中領軍統之  
基彊弩爲三部司馬各置督史左衛熊渠武賁右衛伏飛武賁二  
衛各五部督其命中武賁驍騎遊擊各領之又置武賁羽林上騎  
異力四部并命中爲五督其衛鎮四軍如五校各置千人更制殿  
中將軍中郎校尉司馬此驍騎持椎斧武賁分屬二衛尉中武賁  
持披冗從羽林馬常從人數各有差武帝甚重兵官故軍校多選  
朝廷清望之士居之先是陳騶爲文帝所待特有才用明解軍令  
帝爲晉王委任使典兵事及蜀破後令騶受諸葛亮圍陣用兵倚  
伏之法又甲乙校標幟之制騶悉闇練之遂以騶爲殿中典兵中  
郎將選將軍久之武帝每出入騶持白獸幡在乘輿左右鹵簿陳  
列齊肅太康末武帝常出射雉騶時已爲都水使者散從車駕逼  
暗乃還漏已盡當合函停乘輿良久不得合乃詔騶合之騶舉白

獸幡指麾須臾之間而函成皆謝騶閑解甚爲武帝所任

太子太傅少傅皆古官也泰始三年武帝始建官各置一人尚未  
置詹事官事無大小皆由二傅並有功曹主簿五官太傅中二千  
石少傅二千石其訓導者太傅在前少傅在後皇太子先拜諸傅  
然後答之武帝後以儲副體尊遂命諸公居之以本位重故或行  
或領時侍中任愷武帝所親敬復使領之蓋一時之制也咸寧元  
年以給事黃門侍郎楊珧爲詹事掌官事二傅不復領官屬及楊  
珧爲衛將軍領少傅省詹事遂崇廣傅訓命太尉賈充領太保司  
空齊王攸領太傅所置吏屬復如舊二傅進賢兩梁冠黑介幘五  
時朝服佩水蒼玉食奉日三斛太康二年始給春賜絹五十匹秋  
絹百匹絲百斤其後太尉汝南王亮車騎將軍楊駿司空衛瓘石  
鑒皆領傅保猶不置詹事以終武帝之世惠帝元康元年復置詹

事二傳給萊田六頃田騶六人立夏後及田者食奉一年置丞  
一人秩千石主簿五官掾功曹史主記門下史錄事戶曹法曹倉  
曹賊曹功曹書佐門下亭長門下書佐省事各一人給赤耳安車  
一乘及愍懷建官乃置六傅三太三少以景帝諱師故改太師為  
太保通省尚書事詹事文書關由六傅然自元康之後諸傅或二  
或三或四或六及永康中復不置詹事也自太安已來置詹事終  
孝懷之世渡江之後有太傅少傅不立師保

中庶子四人職如侍中

中舍人四人咸寧四年置以舍人才學美者為之與中庶子共掌  
文翰職如黃門侍郎在中庶子下洗馬上  
食官令一人職如太官令

庶子四人職比散騎常侍中書監令

舍人十六人職比散騎中書等侍郎

洗馬八人職如謁者秘書掌圖籍釋奠講經則掌其事出則直者  
前驅導威儀

率更令主宮殿門戶及賞罰事職如光祿勳衛尉

家令主刑獄穀貨飲食職比司農少府漢東京主食官令食官令  
及晉自為官不復屬家令

僕主車馬親秩職如太僕宗正

左右衛率案惠帝建東宮置衛率初曰中衛率泰始五年分為左  
右各領一軍惠帝時愍懷太子在東宮又加前後二率及江左省  
前後二率孝武太元中又置

王置師友文學各一人景帝諱故改師為傅友者因文王仲尼四  
友之名號改太守為內史省相及僕有郎中令中尉大農為三卿

大國置左右常侍各一人省郎中置侍郎二人典書典祠典衛學  
官令典書丞各一人治書四人中尉司馬世子庶子陵廟牧長各  
一人謁者四人中大夫六人舍人八十人典府各一人咸寧三年衛將  
軍楊珧與中書監荀勗以齊王攸有時望懼惠帝有後難因追故  
司空裴秀立五等封建之旨從容共陳時宜於武帝以爲古者建  
侯所以藩衛王室今吳寇未殄方岳任大而諸王爲帥都督封國  
旣各不臣其統內於事重非宜又異姓諸將居邊宜叅以親戚而  
諸王公皆在京都非扞城之義萬世之固帝初未之察於是下詔  
議其制有司奏從諸王公更制戶邑皆中尉領兵其平原汝南琅  
邪扶風齊爲大國梁趙樂安燕安平義陽爲次國其餘爲小國皆  
制所近縣益滿萬戶又爲郡公制度如小國王亦中尉領兵郡侯  
如不滿五千戶王置一軍一千一百人亦中尉領之于時唯特增

魯公國戶邑追進封故司空博陵公王沈爲郡公鉅平侯羊祜爲  
南城郡侯又南宮王承隨王萬各於泰始中封爲縣王邑千戶至  
是改正縣王增邑爲三千戶制度如郡侯亦置一軍自此非皇子  
不得爲王而諸王之支庶皆皇家之近屬至親亦各以土推恩受  
封其大國次國始封王之支子爲公承封王之支子爲侯繼承封  
王之支子爲伯小國五千戶已上始封王之支子爲子不滿五千  
戶始封王之支子及始封公侯之支子皆爲男非此皆不得封其  
公之制度如五千戶國侯之制度如不滿五千戶國亦置一軍千  
人中尉領之伯子男以下各有差而不置軍大國始封之孫罷下  
軍曾孫又罷上軍次國始封子孫亦罷下軍其餘皆以一軍爲常  
大國中軍二千人上下軍各千五百人次國上軍二千人下軍千  
人其未之國者大國置守土百人次國八十人小國六十人郡侯

縣公亦如小國制度既行所增徙各如本奏遣就國而諸公皆戀京師涕泣而去及吳平後齊王攸遂之國

中朝制典書令在常侍下侍郎上及渡江則侍郎次常侍而典書令居三軍下公國則無中尉常侍三軍侯國又無大農侍郎伯子男唯典書以下又無學官令史職皆以次損焉公侯以下置官屬隨國大小無定制其餘官司各有差名山大澤不以封鹽鐵金銀銅錫始平之竹園別都宮室園囿皆不爲屬國其仕在天朝者與之國同皆自選其文武官諸人作卿士而其世子年已壯者皆遣莅國其王公已下茅社符璽車旗命服一如秦始初故事

州置刺史別駕治中從事諸曹從事等員所領中郡以上及江陽朱提郡郡各置部從事一人小郡亦置一人又有主簿門亭長錄事記室書佐諸曹佐守從事武猛從事等凡吏四十一人卒二十

人諸州邊遠或有山險濱近寇賊羗夷者又置弓馬從事五十餘人徐州又置淮海涼州置河津諸州置都水從事各一人涼益州置吏八十五人卒二十人荊州又置監佃督一人郡皆置太守河南郡京師所在則曰尹諸王國以內史掌太守之任又置主簿主記室門下賊曹議生門下史記室史錄事史書佐循行幹小史五官掾功曹史功曹書佐循行小史五官掾等員郡國戶不滿五千者置吏職五十人散吏十三人五千戶以上則職吏六十三人散吏二十一人萬戶以上職吏六十九人散吏三十九人郡國皆置文學掾一人縣大者置令小者置長有主簿錄事史主記室史門下書佐幹游徼議生循行功曹史小史廷掾功曹史小史書佐幹戶曹掾史幹法曹門幹金倉賊曹掾史兵曹史吏曹史獄小史獄門亭長都亭長賊捕掾等員戶不滿三百以下

職吏十八人散吏四人三百以上職吏二十八人散吏六人五百以上職吏四十人散吏八人千以上職吏五十三人散吏十二人千五百以上職吏六十八人散吏一十八人三千以上職吏八十八人散吏二十六人

郡國及縣農月皆隨所領戶多少為差散吏為勸農又縣五百以上皆置鄉三千以上置二鄉五千以上置三鄉萬以上置四鄉鄉置嗇夫一人鄉戶不滿千以下置治書史一人千以上置史佐各一人正一人五千五百以上置史一作吏一人佐二人縣率百戶置里吏一人其土廣人稀聽隨宜置里吏限不得減五十戶千以上置校官掾一人

縣皆置方略吏四人洛陽縣置六部尉江左以後建康亦置六部尉餘大縣置二人次縣小縣各一人鄴長安置吏如三千戶以上

之制四中郎將並後漢置歷魏及晉並有其職江左彌重

護羌夷蠻等校尉案武帝置南蠻校尉於襄陽西戎校尉於長安南夷校尉於寧州元康中護羌校尉為涼州刺史西戎校尉為雍州刺史南蠻校尉為荊州刺史及江左初省南蠻校尉尋又置於江陵改南夷校尉曰鎮蠻校尉及安帝時於襄陽置寧蠻校尉護匈奴羌戎蠻夷越中郎將案武帝置四中郎將或領刺史或持節為之武帝又置平越中郎將居廣州主護南越

蘇州中鳳崗  
氏書同開書

輿服

史臣曰昔者乘雲效駕卷領垂衣則黃帝皐衣纁裳放勳彤車白馬叶三微之序舍寅丑之建玄戈玉刃作會相暉若乃參旗分景帝車含曜又所以營衛南宮增華北極月令季夏之月命婦官染綵頰丹班次各有品章矣高旗有日月之象式視有威儀之選衣兼鞞珮衡載鳴和是以閑邪屏棄不可入也若乃正名百物補緝四維疏懷山之水靜傾天之害功尤彰者飾彌煥德逾盛者服彌尊莫不質良用成其美書曰明試以功車服以庸禮記曰鸞車有虞氏之路也鈎車夏后氏之路也大路殷路也乘路周路也而鞞火山龍以通其意前史以為聖人見鳥獸容貌草木英華始創衣

蘇州中鳳崗  
氏書同開書

冠而玄黃殊采見秋蓬孤轉杓觴笏建乃作輿輪而方圓異則遇物成象觸類興端周因於殷其來已舊成王之會壇垂陰雨五方之盛有八十物者焉宗馬鳥旌奚往不格殷公曹叔此焉低首周禮巾車氏建大赤以朝大白以戎雅制弘多式遵遺範賓入異憲師行殊則是有嚴有翼用光其武鉤膺條革乃暢其文六服之冕五時之路王之常制各有等差逮禮業彫訛人情馳爽諸侯征伐憲度淪亡一紫亂於齊飾長纓混於鄒玩孔子曰君子其學也博其服也鄉若乃豪傑不經庶人干典影鷁冠於鄭伯之門躡珠履於春申之第及秦皇并國攬其餘軌豐貂東至獬豸南來又有玄旗早旒之制旄頭罕車之飾寫九王之廷於咸陽北坂車輿之綵各樹其文所謂秦人大備而陳戰國之後車者也及凝脂布網經書咸燼削滅三代以金根爲帝軫除棄六冕以衮玄爲祭服高

祖入關旣因秦制世祖挺英雄之略總文景之資揚霓拂翳皮軒記鼓橫汾河而祠后土登甘泉而祭昊天奉常獻儀謂之大駕車千乘而騎萬匹以幸姬趙飛燕置屬車間豹尾中又揚雄所謂矍天狼之威狐一作狐張曜日之靈旄駢羅列布霧集雲合者也於後王氏擅朝武車常軻赤眉之亂文物無遺建武十三年吳漢平蜀始送葆車輿輦充庭之飾漸以周備明帝採周官禮記更服袞章天子冠通天而備玉璽魏明以黼黻之美有疑於僭於是隨章儉略而損者半焉高堂隆奏曰改正朔殊徽號者帝王所以神明其政變民耳目也帝從其議改青龍五年爲景初元年服色尚黃從地正也世祖武皇帝接天人之貺開典午之基受終之禮皆如唐虞故事晉氏金行而服色尚赤豈有司失其傳歟  
玉金象草木等路是爲五路並天子之法車皆朱班漆輪畫爲櫺



文三十幅法月之數重轂貳轄以赤油廣八寸長三尺注地繫兩  
軸頭謂之飛軫金薄繆龍之爲輿倚較較重爲文獸伏軾龍首銜  
軛左右吉陽箭鸞雀立衡櫺文畫轅及轡青蓋黃爲裏謂之黃屋  
金華施椽朱椽二十八以象宿兩箱之後皆玳瑁爲鸚翅加以金  
銀雕飾故世人亦謂之金鸚車斜注旂旗於車之左又加棨戟於  
車之右皆橐而施之棨戟韜以黼繡上爲弋字繫大蛙蟆蟠一作  
軛長丈餘於戟之杪以鼈牛尾大如斗置左駢馬軛上是爲左纛  
轅皆曲向上取禮緯山車垂句之義言不揉而能自曲

玉金象三路各以其物飾車因爲名革者漆革木者漆木其制  
玉路最尊建太常十有二旒九軻委地畫日月升龍以祀天金路  
建大旂九旒以會萬國之賓亦以賜上公及王子母弟象路建大  
赤通赤無畫所以視朝亦以賜諸侯革路建太白以卽戎兵事亦

以賜四鎮諸侯木路建大麾以田獵其麾色黑亦以賜藩國玉路

駕六黑馬餘四路皆駕四馬馬並以黃金爲文髦插以翟尾象鹿

而鏤錫錫在馬面所謂當顛者也金爰而方鈿金爰謂以金爰爲文旄以鐵爲之其大三寸中

纓赤芻易茸金就十有二纓繫馬飾纓馬五路皆有錫鸞之飾和鈴之

響鈎膺玉瓌鈎膺即繫纓也瓌馬帶瑛名也龍軻華轆軻車轆也頭爲龍象轆謂車衡上環受鸞者也朱幘幘飾也人君

旌鼓於其殿庭汗以爲飾也法駕行則五路各有所主不俱出臨軒大會則陳乘輿車輦

車坐乘者謂之安車倚乘者謂之立車亦謂之高車按周禮惟王

后有安車也王亦無之自漢已來制乘輿乃有之有青立車青安

車赤立車赤安車黃立車黃安車白立車白安車黑立車黑安車

合十乘名爲五時車俗謂之五帝車天子所御則駕六其餘並駕

四建旂十二各如車色立車則正豎其旂安車則邪注駕馬馬亦

四建旂十二各如車色立車則正豎其旂安車則邪注駕馬馬亦

各隨五時之色白馬則朱其驪尾左右駢駮金爰鏤錫黃屋左纛  
如金根之制行則從後五牛旗平吳後所造以五牛建旗車設五  
牛青赤在左黃在中白黑在右豎旗於牛背行則使人輿之牛之為義蓋取其負重致遠而安穩也旗常纏不舒則謂德車結旌也

天子親戎則舒謂武車綏旌也

金根車駕四馬不建旗幟其上如畫輪車下猶金根之飾

耕根車駕四馬建赤旗十有二旒天子親耕所乘者也一名芝車  
一名三蓋車置耒耜於軾上魏景初元年改正朔易服色色尚黃牲  
用白戎事乘黑首白馬建大赤之旂朝會則建大白行殷之時也  
泰始二年有司奏宜如有虞遵唐故事皆用前代正朔服色其金  
根耕根車並以建赤旗帝從之

輦按自漢以來為人君之乘魏晉御小出即乘之

戎車駕四馬天子親戎所乘者也載金鼓羽旗幢翳置弩於軾上

其建矛麾悉斜注

獵車駕四馬天子校獵所乘也重輜漫輪繆龍繞之一名闕戟車

一名蹋猪車魏文帝改名蹋獸車

記云國君不乘奇車奇車亦獵車也古天子獵則乘木輅後人代以獵車也

遊車九乘駕四先驅之乘是也

雲罕車駕四

皮軒車駕四以獸皮為軒

鸞旗車駕四先輅所載也鸞旗者謂析羽旄而編之列繫幢傍也

建華車駕四凡二乘行則分居左右

輕車駕二古之獸車也前後二十乘分居左右輿輪洞朱不巾不  
蓋建矛戟麾幢置弩箠於軾上大駕法駕出射聲校尉司馬吏士  
戰士載以次屬車

司南車一名指南車駕四馬其下制如樓三級四角金龍銜羽葆

刻木爲仙人衣羽衣立車上車雖回運而手常南指大駕出行爲先啓之乘

記里鼓車駕四形制如司南其中有木人執槌向鼓行一里則打一槌羊車一名輦車其上如輅伏兔箱漆畫輪輓武帝時護軍羊琇輒乘羊車司隸劉毅糾劾其罪

畫輪車駕牛以綵漆畫輪轂故名曰畫輪車上起四夾杖左右開四望綠油幢朱絲絡青交路其上形制事事如輦其下猶如犢車耳古之貴者不乘牛車漢武帝推恩之末諸侯寡弱貧者至乘牛車其後稍見貴之自靈獻以來天子至士遂以爲常乘至尊出朝堂舉哀乘之

屬車一曰副車一曰貳車一曰左車漢因秦制大駕屬車八十一乘行則中央左右分爲行

法駕屬車二十六乘最後車懸豹尾豹尾以前比之省中屬車皆阜蓋朱裏云

御衣車御書車御輅車御藥車皆駕牛

陽遂四望總牕阜輪小形車駕牛

象車漢鹵簿最在前武帝大康中平吳後南越獻馴象詔作大車駕之以載黃門鼓吹數十人使越人騎之元正大會駕象入庭中朝大駕鹵簿先象車鼓吹一部十三人中道

次靜室令駕一中道式道候二人駕一分左右也

次洛陽尉二人騎分左右

次洛陽亭長九人赤車駕一分三道各吹正二人引

次洛陽令阜車駕一中道

次河南中部掾中道河橋掾在左功曹吏在右並駕一

次河南尹駕四戟吏六人

次河南主簿駕一中道

次河南主記駕一中道

次司隸部河南從事中道都部從事居左別駕從事居右並駕一

次司隸校尉駕三戟吏八人

次司隸主簿駕一中道

次司隸主記駕一中道

次廷尉明法掾中道五官掾居左功曹史居右並駕一

次廷尉卿駕駟戟吏六人

次廷尉主簿主記並駕一在左太僕引從如廷尉在中宗正引從

如廷尉在右

次太常駕駟中道戟吏六人太常外部掾居左五官掾功曹史居

右並駕一

次光祿引從中道太常主簿主記居左衛尉引從居右並駕一

次太尉外督令使駕一中道

次西東賊倉戶等曹屬並駕一引從

次太尉駕駟中道太尉主簿舍人各一人祭酒二人並駕一在左

次司徒引從駕駟中道

次司空引從駕駟中道三公騎令史戟各八人鼓吹各一部七人

次中護軍中道駕駟鹵簿左右各二行戟楯在外弓矢在內鼓吹

一部七人

次步兵校尉在左長水校尉在右並駕一各鹵簿左右二行戟楯

在外刀楯在內鼓吹各一部七人

次射聲校尉在左翊軍校尉在右並駕一各鹵簿左右各二行戟

楯在外刀楯在內鼓吹各一部七人

次驍騎將軍在左游擊將軍在右並駕一皆鹵簿左右引各二行  
戟楯在外刀楯在內鼓吹各一部七人

騎隊五在左五在右隊各五十四命中督二人分領左右各有戟  
吏二人麾幢獨揭鼓在隊前

次左將軍在左前將軍在右並駕一皆鹵簿左右各二行戟楯在  
外刀楯在內鼓吹各一部七人

次黃門麾騎中道

次黃門前部鼓吹左右各一部十三人駕駟八校尉佐仗左右各  
四行外大戟楯

次九尺楯

次弓矢次弩並熊渠攸飛督領之

次司南車駕駟中道 護駕御史騎夾左右

次謁者僕射駕駟中道

次御史中丞駕一中道

次武賁中郎將騎中道

次九游車中道武剛車夾左右並駕駟

次雲罕車駕駟中道

次闕戟車駕駟中道長戟邪偃向後

次皮軒車駕駟中道

次鸞旗車中道建華車分左右並駕駟

次護駕尚書郎三人都官郎中道駕部在左中兵在右並騎又有  
護駕尚書一人騎督攝前後無常

次相風中道

次司馬督在前中道左右各司馬史三人引仗左右各六行外大戟楯二行

次九尺楯

次刀楯

次弓矢

次弩

次五時車左右有遮列騎

次典兵中郎中道督攝前却無常

左殿中御史右殿中監並騎

次高蓋中道左單右罕

次御史中道左右節郎各四人

次華蓋中道

次殿中司馬中道殿中都尉在左殿中校尉在右左右各四行

細楯一行在弩內又殿中司馬一行殿中都尉一行殿中校尉一行

次檜鼓中道

次金根車駕六馬中道

太僕卿大將軍參乘左右又各增三行爲九行

司馬史九人引大戟楯二行九尺楯一行刀楯一行由基一行細

弩一行跡禽一行椎斧一行力人刀楯一行連細楯殿中司馬殿

中都尉殿中校尉爲左右各十二行

金根車建青旂十二左將軍騎在左右將軍騎在右殿中將軍持

鑿臙斧夾車車後衣書主職步從六行合左右三十二行

次曲華蓋中道侍中散騎常侍黃門侍郎並騎分左右

次黃鉞車駕一在左御麾騎在右

次相風中道

次中書監騎左祕書監騎右

次殿中御史騎左殿中監騎右

次五牛旗赤青在左黃在中白黑在右

次大輦中道太官令丞在左太醫令丞在右

次金根車駕駟不建旗

次青立車

次青安車

次赤立車

次赤安車

次黃立車

次黃安車

次白立車

次白安車

次黑立車

次黑安車合十乘並駕駟建旗

十二如車色立車正豎旗安車邪拖之

次蹋猪車駕駟中道無旗

次耕根車駕駟中道赤旗十二熊渠督左攸飛督右

次御輅車

次御四望車

次御衣車

次御書車

次御藥車並駕牛中道

次尚書令在左尚書僕射在右

又尚書郎六人分次左右並駕

又治書侍御史二人分左右又侍御史二人分次左右又蘭臺令

史分次左右並騎

次豹尾車駕一自豹尾車後而鹵薄盡矣但以神弩二十張夾道

至後部鼓吹其五張神弩置一將左右各二將

次輕車二十乘左右分駕

次流蘇馬六十匹

次金鉞車駕三中道左右護駕尚書郎并令史並騎各一人

次金鉞車駕三中道左右護駕侍御史并令史等並騎各一人

次黃門後部鼓吹左右各十三人

次戟鼓車駕牛二乘分左右

次左大鴻臚外部掾右五官掾功曹史竝駕

次大鴻臚駕駟鉞吏六人

次大司農引從中道左大鴻臚主簿主記右少府引從

次三卿並騎吏四人鈴下二人執馬鞭辟車六人執方扇羽林郎十人朱衣

次領軍將軍中道鹵簿左右各二行九尺楯在外弓矢在內鼓吹如護軍

次後軍將軍在左右將軍在右各鹵簿鼓吹如左軍前軍

次越騎校尉在左屯騎校尉在右各鹵簿鼓吹如步兵射聲

次領護驍騎游軍校尉皆騎吏四人乘馬夾道都督兵曹各一人乘馬在中騎將軍四人騎校靴角金鼓鈴下信幡軍校並駕一功

曹吏主簿並騎從幟扇幢麾各一騎鼓吹一部七騎

次領護軍加大車斧五官掾騎從

伯長各一人並騎在後羽林騎督幽州突騎督分領之郎簿十隊隊各五十人絳袍將一人騎靴各一人在前督戰伯長各一人步在後騎皆持稍

次大戟一隊九尺楯一隊刀楯一隊弓一隊弩一隊隊各五十人

黑袴褶將一人騎校靴角各一人步在前督戰伯長各一人步在後金顏督將并領之

皇太子安車駕三左右駢朱班輪倚獸較伏鹿軾九旒畫絳

一作降

龍青蓋金華蚤二十八枚黑褱文畫幡文輶黃金塗五綵亦謂之鸞路非法駕則乘畫輪車上開四望綠油幢朱絲繩絡兩箱裏飾以金錦黃金塗五綵其副車三乘形制如所乘但不畫輪耳王青蓋車皇孫綠蓋車並駕三左右駢

雲母車以雲母飾犢車臣下不得乘以賜王公耳



早輪車駕四牛形制猶如犢車但早漆輪轂上加青油幢朱絲繩絡諸王三公有勳德者特加之

位至公或四望三望夾望車油幢車駕牛形制如早輪但不漆轂耳王公大臣有勳德者特給之

通幔車駕牛猶如今犢車制但舉其幔通覆車上也諸王三公並乘之

諸公給朝車駕四安車黑耳駕三各一乘早輪犢車各一乘自祭酒掾屬以下及令史皆早零辟朝服其武官公又別給大車

特進及車騎將軍驃騎將軍以下諸大將軍不開府非持節都督者給安車黑耳駕二輅車施耳後戶一乘

三公九卿中二千石三千石河南尹謁者僕射郊廟明堂法出皆大車立乘駕駟前後導從大車駕二右駢他出乘安車其去位致

仕告老賜安車駟馬

郡縣公侯安車駕二右駢皆朱班輪倚鹿較伏熊軾黑緇一作皁

繒蓋

公旗旂八旒侯七旒卿五旒皆畫降龍

中二千石二千石皆皁蓋朱兩轡銅五采駕二中二千石以上右駢千石六百石朱左轡車轡長六尺下屈廣八寸上業廣尺二寸

九丈十二初後謙一寸若月初生示不敢自滿也

王公之世子攝命理國者安車駕三旗旂七旒其封侯之世子五旒

太康四年制依漢故事給九卿朝車駕四及安車各一乘

八年詔諸尚書軍校加侍中常侍者皆給傳事乘輅車給劔得入殿省中與侍臣升降相隨

大使車立乘駕四赤帷裳騶騎導從

舊公卿二千石郊廟上陵從駕乘大使車他出乘安車也

小使車不立乘駕四輕車之流也蘭輿皆朱赤轂赤屏泥白蓋赤帷裳從騶騎四十人又別有小使車赤轂阜蓋追捕考按有所執取者之所乘也凡諸使車皆朱班輪赤衡軛

追鋒車去小平蓋加通幟如軹車駕二追鋒之名蓋取其迅速也施於戎陣之間是為傳乘

軹車古之時軍車也一馬曰軹車二馬曰軹傳漢世貴輜輶而賤軹車魏晉重軹車而賤輜輶三品將軍以上尚書令軹車黑耳有後戶僕射但有後戶無耳並阜輪尚書及四品將軍則無後戶漆轂輪其中書監令如僕射侍中黃門散騎初拜及謁陵廟亦得乘之

皇太后皇后法駕乘重翟羽蓋金根車駕青輅青帷裳雲襍畫轅

黃金塗五采蒼凡施金華駕三左右駢其廟見小駕則乘紫罽輶車雲襍畫輶黃金塗五采駕三非法駕則皇太后乘輦皇后乘畫輪車皇后先蠶乘油畫雲母安車駕六騶馬騶淺黑色油畫兩轅安車駕五騶馬為副又金薄石山駢紫絳罽輶車皆駕三騶馬為副女旄頭十二人持棨戟二人共載安車儷駕女尚輦十二人乘輜車儷駕女長御八人乘安車儷駕三夫人油輶車駕兩馬左駢其貴人駕節畫輶三夫人助蠶乘青交路安車駕三皆以紫絳罽輶車九嬪世婦乘輶車駕三

長公主赤罽輶車駕兩馬公主王太妃王妃皆油輶車駕兩馬右駢公主油畫安車駕三青交路以紫絳罽輶車駕三為副王太妃三夫人亦如之公主助蠶乘油畫安車駕三公主有先置者乘青交路安車駕三

諸王妃公太夫人夫人縣鄉君諸郡公侯特進夫人助蠶乘阜交路安車駕三

諸侯監國世子之世婦侍中常侍尚書中書監令卿校世婦命婦助蠶乘阜交路安車儷駕

郡縣公侯中二千石二千石夫人會朝及蠶各乘其夫之安車皆

右駢阜交路阜帷裳自非公會則不得乘朝一作輅車止乘漆布輜

輶銅五采而已

王妃特進夫人封郡君安車駕三阜交路封縣鄉君油輶車駕兩馬右駢

自過江之後舊章多缺元帝踐極始造大路戎路各一皆卽古金根之制也無復充庭之儀至於郊祀大事則權飾餘車以周用六師親征則用戎路去其蓋而乘之屬車但五乘而已加綠油幢朱

絲路飾青交路黃金塗五采其輪轂猶素兩箱無金錦之飾其一車又是輅車舊儀天子所乘駕六是時無復六馬之乘五路皆駕四而已同用黑是爲玄牡無復五時車有事則權以馬車代之建旗其上其後但以五色木牛象五時車豎旗於牛背行則使人輿之牛之義蓋取其負重致遠安而穩也旗常纏而不舒旆所謂德車結旌者也惟天子親戎五旗舒旆所謂武車綏旌者也指南車過江亡失及義熙五年劉裕屠廣固始復獲焉及使工人張綱補緝周用十三年裕定關中又獲司南記里諸車制度始備其輦過江亦亡制度太元中謝安率意造焉及破苻堅於淮上獲京都舊輦形制無差大小如一時人服其精記義熙五年劉裕執慕容超獲金鉦輦豹尾舊式猶存

元帝太興三年皇太子釋奠制曰今草創未有高車可乘安車也

太元中東宮建乘路有青赤旂致疑徐邈議太子既不備五路赤旂宜省漢制太子鸞路皆以安車爲名自晉過江禮儀疎舛王公以下車服卑雜惟有東宮禮秩崇異上次辰極下納侯王而安帝爲皇太子乘石山安車制如金路義不經見事無所出

中宮初建及祀先蠶皆用法駕太僕妻御大將軍妻參乘侍中妻陪乘丹陽尹建康令及公卿之妻奉引各乘其夫車服多以宮人權領其職

周禮弁師掌六冕司服掌六服非后王之制爰及一作至庶人各有等差及秦變古制郊祭之服皆以衲玄舊法掃地盡矣漢承秦弊西京二百餘年猶未能有所制立及中興後明帝乃始採周官禮記尚書及諸儒記說還備衮冕之服天子車乘冠服從歐陽氏說公卿以下從大小夏侯氏說始制天子三公九卿特進之服侍祠天

地明堂皆冠旒冕兼五冕之制一服而已天子備十二章三公諸侯用山龍九章九卿以下用華蟲七章皆具五采

魏明帝以公卿袞衣黼黻之飾疑於至尊多所減損始制天子服刺繡文公卿服織成文及晉受命遵而無改天子郊祀天地明堂宗廟元會臨軒介憤通天冠平冕冕皐表朱綠裏廣七寸長二尺二寸加於通天冠上前圓後方垂白玉珠十有二旒以朱組爲纓無綏佩白玉垂珠黃大旒綬黃赤纁紺四采衣皐上絳下前三幅後四幅衣畫而裳繡爲日月星辰山龍華蟲藻火粉米黼黻之象凡十二章素帶廣四寸朱裏以朱綠裨飾其側中衣以絳緣其領袖赤皮爲韞絳袴袂赤烏未加元服者空頂介憤其釋奠先聖則皐紗袍絳緣中衣絳袴袂黑烏其臨軒亦衮冕也其朝服通天冠高九寸金博山顏黑介憤絳紗袍皐緣中衣其拜陵黑介憤單衣

其雜服有青赤黃白緇黑色介幘五色紗袍五梁進賢冠遠遊冠平上幘武冠其素服白帽單衣後漢以來天子之冕前後旒用眞白玉珠魏明帝好婦人之飾改以珊瑚珠晉初仍舊不改及過江服章多闕而冕飾以翡翠珊瑚雜珠侍中顧和奏舊禮冕十二旒用曰玉珠今美玉難得不能備可用白璇珠從之

通天冠本秦制高九寸正豎頂少斜却乃直下鐵爲卷梁前有展筓冠前加金博山述乘輿所常服也

平冕王公卿助祭於郊廟服之王公八旒卿七旒以組爲纓色如其綬王公衣山龍以下九章卿衣華蟲以下七章

遠遊冠傳玄云秦冠也似通天而前無山述有展筓橫于冠前皇太子及王者後帝之兄弟帝之子封郡王者服之諸王加官者自服其官之冠服惟太子及王者後常冠焉太子則以翠羽爲綉綴以白珠其餘但青絲而已

緇布冠蔡邕云卽委貌冠也太古冠布齊則緇之緇布冠始冠之冠也其制有四形一似武冠又一似進賢其一上方其下如幘顏其一刺上而方下

行鄉射禮則公卿委貌冠以皁絹爲之形如覆杯與皮弁同制長七寸高四寸衣黑而裳素其中衣以皁緣領袖其執事之人皮弁以鹿皮爲之

進賢冠古緇布遺象也斯蓋文儒者之服前高七寸後高三寸長八寸有五梁三梁二梁一梁人主元服始加緇布則冠五梁進賢三公及封郡公縣公郡侯縣侯鄉亭侯則冠三梁卿大夫八座尚書關中內侯二千石及千石以上則冠兩梁中書郎秘書丞郎著作郎尚書丞郎太子洗馬舍人六百石以下至于令史門郎小吏

並冠一梁漢建初中太官令冠兩梁親省御膳爲重也博士兩梁崇儒也宗室劉氏亦得兩梁冠示加服也

武冠一名武弁一名大冠一名繁冠一名建冠一名籠冠卽古之惠文冠或曰趙惠文王所造因以爲名亦云惠者螽也其冠文輕細如蟬翼故名惠文或云齊人見千歲涸澤之神名曰慶忌冠大冠乘小車好疾馳因象其冠而服焉漢幸臣閎儒爲侍中皆服大冠天子元服亦先加大冠左右侍臣及諸將軍武官通服之侍中常侍則加金璫附蟬爲飾插以貂毛黃金爲竿侍中插左常侍插右胡廣曰昔趙武靈王爲胡服以金貂飾首秦滅趙以其君冠賜侍臣應劭漢官云說者以爲金取剛強百鍊不耗蟬居高飲清口在掖下貂內勁悍而外柔縶又以蟬取清高飲露而不食貂則紫蔚柔潤而毛采不彰灼金則貴其寶瑩於義亦有所取或以爲北

土多寒胡人常以貂皮溫額後世效此遂以附冠漢貂用赤黑色王莽用黃貂各附服色所尚也

高山冠一名側注高九寸鐵爲卷梁制似通天頂直豎不斜却無山述展簫高山者詩云高山仰止取其矜莊賓遠者也中外官謁者謁者僕射所服胡廣曰高山齊王冠也傳曰桓公好高冠大帶秦滅齊以其君冠賜謁者近臣應劭曰高山今法冠也秦行人使官亦服之而漢官儀云乘輿冠高山之冠飛翾之纓然則天子亦有時服焉傅子曰魏明帝以其制似通天遠遊故改令卑下法冠一名柱後或謂之獬豸冠高五寸以縱爲展簫鐵爲柱卷取其不曲撓也侍御史廷尉正監平凡執法官皆服之或謂獬豸神羊能觸邪佞異物志云北荒之中有獸名獬豸一角性別曲直見人鬪觸不直者聞人爭咋不正者楚王嘗獲此獸因象其形以制

衣冠胡廣曰春秋左氏傳晉侯觀于軍府見鍾儀曰南冠而縶者誰也南冠卽楚冠秦滅楚以其冠服賜執法臣也

長冠一名齊冠高七寸廣三寸漆纒爲之制一作如版以竹爲裏

漢高祖微時以竹皮爲此冠其世因謂劉氏冠後除竹用漆纒司馬彪曰長冠蓋楚制人間或謂之鵲尾冠非也救日蝕則服長冠而祠宗廟諸祀冠之此高祖所造後世以爲祭服尊敬之至也

建華冠以鐵爲柱卷貫大銅珠九枚古用雜木珠原憲所冠華冠是也又春秋左氏傳鄭子臧好聚鵲冠謂建華是也祀天地五郊

明堂舞人服之漢育命舞一作樂人所服

方山冠其制似進賢鄧展曰方山冠以五采縠爲之漢天子一作天子八佾五行樂人所服冠衣各如其行方之色而舞焉

巧士冠前高七寸要後相通直豎此冠不常用漢氏惟郊天黃門

從官四人冠之在鹵簿中夾乘輿車前以備宦者四星或云掃除從官所服却非冠高五寸制似長冠宮殿門吏僕射冠之負赤幡青翅燕尾諸僕射幡皆如之

却敵冠前高四寸通長四寸後高三寸制似進賢凡當殿門衛士服之

樊噲冠廣九寸高七寸前後出各四寸制似平冕昔楚漢會於鴻門項籍圖危高祖樊噲常持鐵楯聞急乃裂裳苞楯戴以爲冠排入羽營因數羽罪漢王乘間得出後人壯其意乃制冠象焉凡殿門司馬衛士服之

衛氏冠前圓吳制差池四重趙武靈王好服之或曰楚莊王復讐冠是一無是字也

鷓冠加雙鷓尾豎插兩邊鷓鳥名也形類鷓而微黑性果勇其鬪

到死乃止上黨賁之趙武靈王以表顯壯士至秦漢猶施之武人

皮弁以鹿皮淺毛黃白色者為之禮王皮弁會五采玉璆象玉邸

玉笄謂之合為弁其縫中名曰會以采玉朱一作珠為璆璆結也天

子五采諸侯三采邸冠下抵也象骨為之音帝也天子則縫十二公侯伯七子男五孤

四卿大夫三

韋弁制似皮弁頂上尖韎草染之色如淺絳

爵弁一名廣冕高八寸長二寸如爵形前小後大增其上似爵頭

色有收持笄所謂夏收殷啤者也祠天地五郊明堂翹舞樂人服

之

幘者古賤人不冠者之服也漢元帝額有壯髮始引幘服之王莽

頂禿又加其屋也漢注曰冠進賢者宜長耳今介幘也冠惠文者

宜短耳今平上幘也始時各隨所宜遂因冠為別介幘服文吏平

上幘服武官也童子幘無屋者示不成人也又有納言幘幘後收

又一重方三寸又有赤幘騎吏武吏乘輿鼓吹所服救日蝕文武

官皆免冠著幘對朝服示武威也

漢儀立秋日獵服緇幘及江左哀帝從博士曹弘之等議立秋御

讀令改用素白帽按漢末王公名士多委王服以幅巾為雅是以

袁紹崔鈞之徒雖為將帥皆著縑巾魏武以天下凶荒資財乏匱

擬古皮弁裁縑帛以為帽合乎簡易隨時之義以色別其貴賤本

施軍飾非為國容也徐爰曰俗說帽本未有岐荀文若巾之行觸

樹枝成岐謂之為善因而弗改今通以為慶吊服

巾以葛為之形如帽而橫着之古尊卑共服也故漢末妖賊以黃

為巾世謂黃巾賊

帽名猶冠也義取於蒙覆其首其本纚也古者冠無幘冠下有纚



以繒爲之後世施幘於冠因或裁纒一作纓爲帽自乘輿宴居下至庶人無爵者皆服之成帝咸和九年制聽尚書八座承郎門下三省侍官乘車白帽低幘出入掖門又二宮直官著烏紗帽然則往往士人宴居皆著帽矣時江左時野人已著帽人士亦往往而然但其頂圓耳後乃高其屋云

漢制自天子至于百官無不佩劍其後惟朝帶劍晉世始代之以木貴者猶用玉首賤者亦用蚌金銀玳瑁爲雕飾

乘輿六璽秦制也曰皇帝行璽皇帝之璽皇帝信璽天子行璽天子之璽天子信璽漢遵秦不改又有秦始皇藍田玉璽螭獸紐在六璽之外文曰受天之命皇帝壽昌漢高祖佩之後世名曰傳國璽與斬白蛇劍俱爲乘輿所寶斬白蛇劍至惠帝時武庫火燒之遂亡及懷帝沒胡傳國璽沒於劉聰後又沒於石勒及石季龍死

胡亂穆帝世乃還江南

革帶古之鞶帶也謂之鞶革文武衆官牧守丞令下及騶寺皆服之其有囊綬則以綴於革帶其戎服則以皮絡帶代之八坐尚書荷紫以生紫爲袷囊綴之服外加於左肩昔周公負成王制此服衣至今以爲朝服或云漢世用盛奏事負之以行未詳也

車前五百者卿行旅從五百人爲一旅漢氏一統故去其人畱其名也

袴褶之制未詳所起近世凡車駕親戎中外戎嚴服之服無定色冠黑帽綴紫標標以繒爲之長四寸廣一寸腰有絡帶以代鞶中官紫標外官絳標又有纂嚴戎服而不綴標行畱文武悉同其畷獵巡幸則惟從官戎服帶鞶革文官不下纓武官服冠漢制一歲五郊天子與執事者所服各如方色百官不執事者服

常服絳衣以從魏祕書監秦靜曰漢氏承秦改六冕之制但玄冠絳衣而已魏已來名爲五時朝服又有四時朝服又有朝服自皇太子以下隨官受給百官雖服五時朝服據今止給四時朝服闕秋服三年一易

諸假印綬而官不給鞶囊者得自具作其但假印不假綬者不得佩綬鞶古制也漢世著鞶囊者側在腰間或謂之傍囊或謂之綬囊然則以紫囊盛綬也或盛或散各有其時

笏古者貴賤皆執笏其有事則搢之於腰帶所謂搢紳之士者搢笏而垂紳帶也紳垂長三尺笏者有事則書之故常簪筆今之白筆是其遺象三臺五省二品文官簪之王公侯伯子男卿尹及武官不簪加內侍位者乃簪之手版卽古笏矣尙書令僕射尙書手版頭復有白筆以紫皮裹之名曰笏

皇太子金璽龜鈕朱黃綬四采赤黃纁紺給五時朝服遠遊冠介幘翠綉佩瑜玉垂組朱衣絳紗褌皁緣白紗其由衣白曲領帶劍火珠素首革帶玉鉤燹獸頭鞶囊

其大小會祠宗廟朔望五日還朝皆朝服常還上宮則朱服預上宮正會則於殿下脫劍舄又有三梁進賢冠其侍祀則平冕九旒袞衣九章白紗絳緣中單絳繒鞞承畫織成袞帶金辟邪首紫綠二色帶采畫廣領曲領各一赤舄絳袜若講則著介幘單衣釋奠則遠遊冠玄朝服絳緣中單絳袴袜玄舄若未加元服則中舍人

執冕從介一中元玄

一無一中元玄四字

諸王金璽龜鈕纁朱綬四采朱黃纁紺五時朝服遠遊冠介幘亦有三梁進賢冠朱衣絳紗褌皁緣中衣表素革帶黑舄佩山玄玉垂組大帶若加餘官則服其加官之服也皇后謁廟其版早上皁

下親蚕則青上縹下皆深衣制隱領袖緣以條一作條首飾則假髻步搖俗謂之珠松是也簪珥步搖以黃金為山題貫白珠為支相繆八爵九華熊獸赤羆天鹿辟邪南山豐大特六獸諸爵獸皆以翡翠為毛羽金題白珠璫繞以翡翠為華元康六年詔曰魏以來皇后蚕服皆以文繡非古義也今宜純服青以為永制  
貴人夫人貴嬪是為三夫人皆金章紫綬章文曰貴人夫人貴嬪之章佩于寘玉

淑妃淑媛淑儀修華修容修儀婕妤好容華充華是為九嬪銀印青綬佩采瓊玉貴人貴嬪夫人助蚕服純縹為上輿下皆深衣制太平髻七鑲蔽髻黑玳瑁又加簪珥九嬪及公主夫人五鑲世婦三鑲助蠶之義自古而然矣

皇太子妃金璽龜鈕纁朱綬佩瑜玉

諸王太妃太姬諸長公主公主封君金印紫綬佩山玄玉

長公主公主見會太平髻七鑲蔽髻其長公主得有步搖皆有簪珥衣服同制自公主封君以上皆帶綬以綵組為緹帶各如其綬色金辟邪首為帶玦

郡公侯縣公侯太夫人夫人銀印青綬佩水蒼玉其特加乃金紫

公特進侯卿校世婦中二千石二千石夫人紺繒幘黃金龍首銜白珠魚須璽長一尺為簪簪珥入廟佐祭者阜絹上下助蠶者縹絹上下皆深衣制緣自二千石夫人以上至皇后皆以蠶衣為朝服

終

晉書二十五

食貨

晉書二十六

昔者先王量地以制邑度地以居民因三才以節其務敬四序以成其業觀其謠俗而正其紀綱勗農桑之本通魚鹽之利登良山而採符玉泛瀛海而罩珠璣日中為市總天下之隸先諸布帛繼以貨泉貿遷有無各得其所周禮正月始和乃布教于象魏若乃一夫之士十畝之宅三日之徭九均之賦施陽禮以興其讓命春社以勗其耕天之所貴者人也明之所求者學也治經入官則君子之道焉詩曰三之日于耜四之日舉趾是以農官澤虞各有攸次父兄之習不翫而成十五從務始勝衣服鄉無遊手邑不廢時所謂厥初生民各從其事者也是以太公通市井之貨以致齊國

晉書二十六

之強鴟夷善發斂之居以盛中陶之業昔在金天勤於民事命春  
鳳以耕稼召夏鳳以耘鋤秋鳳所以收斂冬鳳於焉蓋藏書曰歷  
象日月星辰敬授民時傳曰禹稷躬稼而有天下若乃九土旣敷  
四民承範東吳有齒角之饒西蜀有丹砂之富兗豫漆絲之膾燕  
齊怪石之府秦邠旄羽迴帶琅玕荆郢桂林芻通竹箭江干橘柚  
河外舟車遼西旃罽之鄉葱右蒲梢之駿植物怪錯于何不有若  
乃上法星象下料無外因天地之利而總山海之饒百畝之田十  
一而稅九年躬稼而有三年之蓄可以長孺齒可以養耆年因乎  
人民用之邦國宮室有度旗章有序朝聘自其儀宴饗由其制家殷  
國阜遠至邇安救水旱之災卹寰瀛之弊然後王之常膳乃間笙  
鏞商周之興用此道也辛紂暴虐翫其經費金鏤傾宮廣延百里  
玉飾鹿臺崇高千仞宮中九市各有女司厚賦以實鹿臺之錢大

斂以增鉅橋之粟多發妖冶以充傾宮之麗廣收珍玩以備沙丘  
之遊懸肉成林積醪爲沼使男女裸體相逐於其間伏詣酒池中  
牛飲者三千餘人宮中以錦綺爲席綾紈爲薦及周王誅紂肅拜  
殷墟乃盡振鹿財並頒橋粟上天降休殷人大喜王赧云季徙都  
西周九鼎淪沒二南堙盡貸於百姓無以償之乃上層臺以避其  
責周人謂王所居爲逃責臺者也昔周姬公制以六典職方陳其  
九貢頒財內府永爲不刊及刑政陵夷菁茅罕至魯侯初踐畝之  
稅秦君收太半之入前王之範靡有孑遺史臣曰班固爲殖貨志  
自三代至王莽之誅網羅前載其文詳悉光武寬仁龔行天討王  
莽之後赤眉新敗雖復三暉乃睠而九服蕭條及得隴望蜀黎民  
安堵自此始行五銖之錢田租三十稅一民有產子者復以三年  
之算顯宗卽位天下安寧民無橫徭歲比登稔永平五年作常滿

倉立粟市於城東粟斛直錢二十草樹殷阜牛羊彌望作貢尤輕  
府廩還積姦回不用禮義專行于時東方旣明百官詣闕戚里侯  
家自相馳騫車如流水馬若飛龍照映軒廡光華前載傳曰三統  
之元有陰陽之九焉蓋天地之恒數也安帝永初三年天下水旱  
人民相食帝以鴻陂之地假與貧民以用度不足三公又奏請令  
吏民入錢穀得爲關內侯云桓帝永興元年郡國少半遭蝗河泛  
數千里流人十餘萬戶所在廩給乏建寧永和之初西羌反叛二  
十餘年兵連師老軍旅之費三百二十餘億府帑空虛延及內郡  
冲質短祚桓靈不軌中平二年南宮災延及北闕於是復收天下  
田畝十錢用營宮宇帝出自侯門居貧卽位常曰桓帝不能作家  
曾無私蓄故於西園造萬金堂以爲私藏復寄小黃門私錢家至  
巨億於是懸鴻都之榜開賣官之路公卿以降悉有等差廷尉崔

烈入錢五百萬以買司徒刺史二千石遷除皆責助治宮室錢大  
郡至二千萬錢不畢者或至自殺獻帝作五銖錢而有四道連於  
邊緣有識者尤之曰豈京師破壞此錢四出也及董卓尋戈火焚  
宮室乃劫鸞駕西幸長安悉壞五銖錢更鑄小錢盡收長安及洛  
陽銅人飛廉之屬以充鼓鑄又錢無輪郭文章不便時人以爲秦  
始皇見長人於臨洮乃鑄銅人卓臨洮人也興毀不同凶訛相類  
及卓誅死李傕郭汜自相攻伐於長安城中以爲戰地是時穀一斛  
五十萬豆麥二十萬人相食啖白骨盈積殘骸餘肉臭穢道路帝  
使侍御史侯汶出太倉米豆爲饑民作糜經日頒布而死者愈多  
帝於是始疑有司盜其糧廩乃親於御前自加臨給饑者人皆泣  
曰今始得耳帝東歸也李傕郭汜等追敗乘輿於曹陽夜潛渡河  
六宮皆步初出營欄后手持縑數匹董承使符節令孫徽以刃脅

奪之殺旁侍者血濺后服既至安邑御衣穿敗唯以野棗園菜以爲糒糧自此長安城中盡空並皆四散二三年間關中無復行人建安元年車駕至洛陽宮闈蕩滌百官披荆棘而居焉州郡各擁強兵而委輸不至尚書郎官自出採梠或不能自反死於墟巷魏武之初九州雲擾攻城掠地保此懷民軍旅之資權時調給于時袁紹軍人皆資棗棗袁術戰士取給羸蒲魏武于是乃募良民屯田許下又於州郡列置田官歲有數千萬斛以充兵戎之用及初平袁氏以定鄴都令收田租畝粟四升戶絹二匹而綿二斤餘皆不得擅興藏強賦弱文帝黃初二年以穀貴始罷五銖錢于時天下未并戎車歲動孔子曰加之以師旅因之以饑饉此言兵凶之謀而沴氣應之也于時三方之人志相吞滅戰勝攻取耕夫釋耒江淮之鄉尤缺儲峙吳上大將軍陸遜抗疏請令諸將各廣其田

權報曰甚善今孤父子親自受田車中八牛以爲四耦雖未及古人亦欲與衆均其勞也有吳之務農重穀始於此焉魏明帝不恭淫於宮籞百僚編于手役天下失其躬稼此後關東遇水民亡產業而興師遼陽坐甲江甸皆以國乏經用胡可勝言世祖武皇帝太康元年既平孫皓納百萬而罄三吳之資接千年而總西蜀之用韜干戈于府庫破舟船於江壑河濱海岸三丘八藪耒耨之所不至者人皆受焉農祥晨正平秩東作荷鍤羸糧有同雲布若夫因天而資五緯因地而興五才世屬升平物流倉府宮闈增飾服翫相輝於是王君夫武子石崇等更相誇尚輿服鼎俎之盛連衡帝室布金埒之泉粉珊瑚之樹物盛則衰固其宜也永寧之初洛中尚有錦帛四百萬寶珠金銀百餘斛惠后北征蕩陰反駕寒桃在御隻雞以給其布衾兩幅囊錢三千以爲車駕之資焉懷帝爲

劉曜所圍王師累敗府帑既竭百官饑甚比屋不見火煙饑人自相啖食愍皇西宅餒饑弘多斗米二金死者大半劉曜陳兵內外斷絕十甗之麴屑而供帝君臣相顧莫不揮涕元后渡江軍事草創蠻陬賧布不有恒準中府所儲數四千匹于時石勒勇銳挺亂江南帝懼其侵逼甚患之乃詔方鎮云有斬石勒首者賞布千匹云

漢自董卓之亂百姓流離穀石至五千餘萬人多相食魏武既破黃巾欲經略四方而苦軍食不足羽林監潁川棗祗建置屯田議魏武乃令曰夫定國之術在於強兵足食秦人以急農兼天下孝武以屯田定西域此先世之良式也於是以任峻為典農中郎將募百姓屯田許下得穀百萬斛郡國列置田官數年之中所在積粟倉廩皆滿祗死魏武後追思其功封爵其子建安初關中百姓

流入荊州者十餘萬家及聞本土安寧皆企望思歸而無以自業於是衛覲議為鹽者國之大寶自喪亂以來放散今宜如舊置使者監賣以其直益市犁牛百姓歸者以供給之勤耕積粟以豐殖關中遠者聞之必多競還於是魏武遣謁者僕射監鹽官移司隸校尉居弘農流人果還關中豐實既而又以沛國劉馥為揚州刺史鎮合肥廣屯田修芍陂茹陂七門吳塘諸竭以溉稻田公私有蓄歷代為利賈遠之為豫州南與吳接修守戰之具竭汝水造新陂又通運渠三百餘里所謂賈侯渠者也當黃初中四方郡守墾田又加以故國用不匱時濟北顏斐為京兆太守京兆自馬超之亂百姓不專農殖乃無車牛斐又課百姓令閑月取車材轉相教匠其無牛者令養猪投貴賣以買牛始者皆以為煩一二年中編戶皆有車牛於田役省贍京兆遂以豐沃鄭渾為沛郡太守郡居



下濕水滂爲患百姓饑乏渾於蕭相二縣與陂塌開稻田郡人皆不以爲便渾以爲終有經久之利遂躬率百姓興功一冬皆成比年大收頃畝歲增租入倍常郡中賴其利刻石頌之號曰鄭陂魏明帝世徐邈爲涼州土地少雨常苦乏穀邈上修武威酒泉鹽池以收虜穀又廣開水田募貧民佃之家家豐足倉庫盈溢及度支州界軍用之餘以市金錦犬馬通供中國之費西域人入貢財貨流通皆邈之功也其後皇甫隆爲敦煌太守敦煌俗不使耬犁及不知用水人牛功力旣費而收穀更少隆到乃教作耬犁又教使灌溉歲終率計所省庸力過半得穀加五西方以豐嘉平四年關中饑宣帝表徙冀州農失五千人佃上邽興京兆天水南安鹽池以益軍實青龍元年開成國渠自陳倉至槐里築臨晉陂引汧洛溉烏鹵之地三千餘頃國以充實焉正始四年宣帝又督諸軍伐

吳將諸葛恪焚其積聚恪棄城遁走帝因欲廣田積穀爲兼并之計乃使鄧艾行陳項以東至壽春地艾以爲田良水少不足以盡地利宜開河渠可以大積軍糧又通運漕之道乃著濟河論以喻其指又以爲昔破黃巾因爲屯田積穀許都以制四方今三隅已定事在淮南每大軍征舉運兵過半功費巨億以爲大役陳蔡之間土下田良可省許昌左右諸稻田并水東下令淮北二萬人淮南三萬人分休且佃且守水豐常收三倍於西計除衆費歲完五百萬斛以爲軍資六七年間可積三千萬餘斛於淮土一作北此則十萬之衆五年食也以此乘敵無不剋矣宣帝善之皆如艾計施行遂北臨淮水自鍾離而南橫石以西盡泚水四百餘里五里置一營營六十人且佃且守兼修廣淮陽百尺二渠上引河流下通淮潁大治諸陂於潁南潁北穿渠三百餘里溉田二萬頃淮南淮

北皆相連接自壽春到京師農官兵田雞犬之聲阡陌相屬每東南有事大軍出征汎舟而下達于江淮資食有儲而無水害艾所建也及晉受命武帝欲平一江表時穀賤而布帛貴帝欲立平糴法用布帛市穀以爲糧儲議者謂軍資尚少不宜以貴易賤泰始二年帝乃下詔曰夫百姓年一作平豐則用奢兇荒則窮匱是相報之理也故古人權量國用取贏散滯有輕重平糴之法理財鈞施惠而不費政之善者也然此事廢久天下希習其宜加以官蓄未廣言者異同財貨未能達通其制更令國寶散於穰歲而上不收貧弱困於荒年而國無備豪人富商挾輕資蘊重積以管其利故農夫苦其業而末作不可禁也今者省徭務本并力墾殖欲令農功益登耕者益勸而猶或騰踴至於農人並傷今宜通糴以充儉法主者平議具爲條制然事竟未行是時江南未平朝廷厲精於

稼穡四年正月丁亥帝親耕籍田庚寅詔曰使四海之內棄反本競農務功能奉宣朕志令百姓勸事樂業者其唯郡縣長吏乎先之勞之在於不倦每念其經營職事亦爲勤矣其以中左典牧種草馬賜縣令長相及郡國丞各一匹是歲乃立常平倉豐則糴儉則糶以利百姓五年正月癸巳勅戒郡國計吏諸郡國守相令長務盡地利禁游食商販其休假者令與父兄同其勤勞豪勢不得侵役寡弱私相置名十月詔以司隸校尉石鑿所上汲郡太守王宏勤恤百姓遵化有方督勸開荒五千餘頃遇年普饑而郡界獨無匱乏可謂能以勸教時同功異者矣其賜穀千斛布告天下八年司徒石苞秦州郡農桑未有殿最之制宜增掾屬令史有所循行帝從之事見石苞傳苞旣明於勸課百姓安之十年光祿勳夏侯和上修新渠富壽遊陂三渠凡溉田千五百頃咸寧元年十

二月詔曰出戰入耕雖自古之常然事力未息未嘗不以戰士爲念也今以鄴奚官奴婢著新城代田兵種稻奴婢各五十人爲一屯屯置司馬使皆如屯田法三年又詔曰今年霖雨過差又有蟲災潁川襄城自春以來略不下種深以爲慮主者何以爲百姓計促處當之杜預上疏曰臣輒思惟今者水災東南特劇非但五稼不收居業并損下田所在停污高地皆多磽壿此卽百姓困窮方在來年雖詔書切告長吏二千石爲之設計而不廓開大制定其趣舍之宜恐徒文具所益蓋薄當今秋夏蔬食之時而百姓已有不贍前至冬春野無青艸則必指仰官穀以爲生命此乃一方之大事不可不豫爲思慮者也臣愚謂旣以水爲困當恃魚菜螺蚌而洪波汎濫貧弱者終不能得今者宜大壞兗豫州東界諸陂隨其所歸而宣導之交令饑者盡得水產之饒百姓不出境界之內

且暮野食此目下日給之益也水去之後填淤之田畝收數鍾至春大種五穀五穀必豐此又明年益也臣前啓典牧種牛不供耕駕至於老不穿鼻者無益於用而徒有吏士穀草之費歲送任駕者甚少尙復不調習宜大出賣以易穀及爲賞直詔曰孳育之物不宜減散事遂停寢問主者今典虞右典牧種產牛大小相通有四萬五千餘頭苟不益世用頭數雖多其費日廣古者匹馬丘牛居則以耕出則以戰非如猪羊類也今徒養宜用之牛終爲無用之費甚失事宜東南以水田爲業人無牛犢今旣壞陂可分種牛三萬五千頭以付二州將吏士庶使及春耕穀登之後頭責三百斛是爲化無用之費得運水次成穀七百萬斛此又數年後之益也加以百姓降丘宅土將來公私之饒乃不可計其所畱好種萬頭可卽令右典牧都尉官屬養之人多畜少可並佃牧地明其考

課此又三魏近甸歲當復入數千萬斛穀牛又皆當調習動可駕用皆今日之可全者也預又言諸欲修水田者皆以火耕水耨爲便非不爾也然此事施於新田草萊與百姓居相絕離者耳往者東南草創人稀故得火田之利自頃戶口日增而陂塲歲決良田變生蒲葦人居沮澤之際水陸失宜放牧絕種樹木立枯皆陂之害也陂多則土薄水淺潦不下潤故每有水雨輒復橫流延及陸田言者不思其故因云此土不可陸種臣計漢之戶口以驗今之陂處皆陸業也其或有舊陂舊塲則堅完修固非今所謂當爲人害者也臣前見尚書胡威啓宜壞陂其言懇至臣中者又見宋侯相應遵上便宜求壞泗陂徒運道時下都督度支共處當各據所見不從遵言臣按遵上事運道東詣壽春有舊渠可不由泗陂泗陂在遵地界壞地凡萬三千餘頃傷敗成業遵縣領應佃二千六

百口可謂至少而猶患地狹不足肆力此皆水之爲害也當所共恤而都督度支方復執異非所見之難直以不同害理也人心所見旣不同利害之情又有異軍家之與郡縣士大夫之與百姓其意莫有同者此皆偏其利以忘其害者也此理之所以未盡而事之所以多患也臣又案豫州界二度支所領佃者州郡大軍雜士凡用水田七千五百餘頃耳計三年之儲不過二萬餘頃以常理言之無爲多積無用之水况於今者水潦溢大爲災害臣以爲與其失當寧瀉之不瀉宜發明詔勅刺史二千石其漢氏舊陂舊塲及山谷私家小陂皆當修繕以積水其諸魏氏以來所造立及諸因雨決溢蒲葦馬腸陂之類皆決瀝之長吏二千石躬親勸功諸食力之人並一時附功令比及水凍得粗枯涸其所修功實之人皆以俾之其舊陂塲溝渠富有所補塞者皆尋求微跡一如漢

時故事豫爲部分列上須冬東南休兵交代各畱一月以佐之夫  
川瀆有常流地形有定體漢氏居人衆多猶以無患今因其所患  
而宣寫之跡古事以明近大理顯然可坐論而得臣不勝愚意竊  
謂最是今日之實益也朝廷從之及平吳之後有司又奏詔書王  
公以國爲家京城不宜復有田宅今未暇作諸國邸當使城中有  
往來處近郊有芻藁之田今可限之國王公侯京城得有一宅之  
一作處近郊田大國田十五頃次國十頃小國七頃城內無宅城  
外有者皆聽畱之又制戶調之式丁男之戶歲輸絹三匹綿三斤  
女及次丁男爲戶者半輸其諸邊郡或三分之二遠者三分之一  
夷人輸實布戶一匹遠者或一丈男子一人占田七十畝女子三  
十畝其外丁男課田五十畝丁女二十畝次丁男半之女則不課  
男女年十六已上至六十爲正丁十五已下至十三六十一已上

至六十五爲次丁十二已下六十六已上爲老小不事遠夷不課  
田者輸義米戶三斛遠者五斗極遠者輸算錢人二十八文其官  
品第一至于第九各以貴賤占田品第一者占五十頃第二品四  
十五頃第三品四十頃第四品三十五頃第五品三十頃第六品  
二十五頃第七品二十頃第八品十五頃第九品十頃而又各以  
品之高卑蔭其親屬多者及九族少者三世宗室國賓先賢之後  
及士人子孫亦如之而又得蔭人以爲衣食客及佃客品第六已  
上得衣食客三人第七第八品二人第九品及舉輦跡禽前驅由  
基強弩司馬羽林郎殿中冗從武賁殿中武賁持椎斧武騎武賁  
持鉞冗從武賁命中武賁武騎一人其應有佃客者官品第一第  
二者佃客無過五十戶第三品十戶第四品七戶第五品五戶第  
六品三戶第七品二戶第八品第九品一戶是時天下無事賦稅

平均人咸安其業而樂其事及惠帝之後政教陵夷至於永嘉喪亂彌甚雍州以東人多饑乏更相鬻賣奔迸流移不可勝數幽并司冀秦雍六州大蝗草木及牛馬毛皆盡又大疾疫兼以饑饉百姓又爲寇賊所殺流尸滿河白骨蔽野劉曜之逼朝廷議欲遷都倉垣人多相食饑疫總至百官流亡者十八元帝爲晉王課督農功詔二千石長吏以入穀多少爲殿最其非宿衛要任皆宜赴農使軍各自佃作卽以爲廩太興元年詔曰徐揚二州土宜三麥可督令爨地投秋下種至夏而熟繼新故之交於以周濟所益甚大昔漢遣輕車使者汜勝之督三輔種麥而關中遂穰勿令後晚其後頻年麥雖有旱蝗而爲益猶多二年三吳大饑死者以百數吳郡太守鄧攸輒開倉廩賑之武帝時使黃門侍郎虞駿相彛開倉廩振給并省衆役百官各上封事後軍將軍應詹表曰夫一人

不耕天下必有受其饑者而軍興以來征戰運漕朝廷宗廟百官用度旣已殷廣下及工商流寓僮僕不親農桑而遊食者以十萬計不思開立美利而望國足人給豈不難哉古人言曰饑寒並至堯舜不能使野無寇盜貧富并兼雖臯陶不能使強不陵弱故有國有家者何嘗不務農重穀近魏武皇帝用棗祗韓浩之議廣建屯田又於征伐之中分帶甲之士隨宜開墾故下不甚勞而大功克舉也間者流人奔東吳東吳今儉皆已還反江西良田曠廢來久火耕水耨爲功差易宜簡流人興復農官功勞報賞皆如魏氏故事一年中與百姓二年分稅三年計賦稅以使之公私兼濟則倉盈庾億可計旦而待也又曰昔高祖使蕭何鎮關中光武令寇恂守河內魏武委鍾繇以西事故能使八表夷蕩區內輯寧今中州蕭條未蒙疆理此兆庶所以企望壽春一方之會去此不遠宜

選都督有文武經略者遠以振河洛之形勢近以爲徐豫之藩鎮  
綏集流散使人有攸依專委農功令事有所局趙充國農於金城  
以平西零諸葛亮耕於渭濱規抗上國今諸軍自不對敵皆宜齊  
課咸和五年成帝始度百姓田取十分之一率畝稅米三升六年  
以海賊寇抄運漕不繼發王公以下餘丁各運米六斛是後頻年  
水災旱蝗田收不至咸康初算度田稅米空懸五十餘萬斛書  
褚裒以下免官穆帝之世頻有大軍糧運不繼制王公以下十二  
戶共借一人助度支運升平初荀羨爲北府都督鎮下邳起田于  
東陽之石鼈公私利之哀帝卽位乃減田租畝收二升孝武太元  
二年除度田收租之制王公以下口稅三斛唯蠲在役之身八年  
又增稅米口五石至於末年天下無事時和年豐百姓樂業穀帛  
殷阜幾乎家給人足矣

漢錢舊用五銖自王莽改革百姓皆不便之及公孫述僭號於蜀  
童謠曰黃牛白腹五銖當復好事者竊言王莽稱黃述欲繼之故  
稱白腹五銖漢貨言漢當復併天下也至光武中興除莽貨泉建  
武十六年馬援又上書曰富國之本在於食貨宜如舊鑄五銖錢  
帝從之於是復鑄五銖錢天下以爲便及章帝時穀帛價貴縣官  
經用不足朝廷憂之尚書張林言今非但穀貴也百物皆貴此錢  
賤故爾宜令天下悉以布帛爲租市買皆用之封錢勿出如此則  
錢少物皆賤矣又鹽者食之急也縣官可自賣鹽武帝時施行之  
名曰均輸於是事下尚書通議尚書朱暉議曰王制天子不言有  
無諸侯不言多少食祿者不與百姓爭利均輸之法與賈販無異  
以布帛爲租則吏多姦官自賣鹽與下爭利非明主所宜行帝本  
以林言爲是得暉議因發怒遂用林言少時復止和帝時有上書

言人以貨輕錢薄故致貧困宜改鑄大錢事下四府羣僚及太學能言之士孝廉劉陶上議曰臣伏讀鑄錢之詔平輕重之議訪覃幽微不遺窮賤是以藿食之人謬延逮及蓋以當今之憂不在於貨在於人饑是以先王觀象育物敬授民時使男不逋畝女不下機故君臣之道行王路之教通由是言之食者乃有國之所寶百姓之至貴也竊以比年已來良苗盡於蝗螟之口籽袖空於公私之求所急朝夕之食所患靡盬之事豈謂錢之厚薄銖兩之輕重哉就使當今沙磧化爲南金瓦石變爲和玉使百姓渴無所飲饑無所食雖皇羲之純德唐虞之文明猶不能以保蕭牆之內也蓋百姓可百年無貨不可以一朝有饑故食爲至急也議者不達農殖之本多言鑄冶之便或欲因緣行詐以賈國利國利將盡取者爭競造鑄之端於是乎生蓋萬人鑄之一人奪之猶不能給况今

一人鑄之則萬人奪之乎雖以陰陽爲炭萬物爲銅役不食之民使不饑之士猶不能足無厭之求也夫欲民財殷阜要在止役役禁奪則百姓不勞而足陛下聖德愍海內之憂戚傷天下之艱難欲鑄錢齊貨以救其弊此猶養魚沸鼎之中棲鳥烈火之上木水本魚鳥之所生也用之不時必至焦爛願陛下寬鍥薄之禁後冶鑄之議也帝竟不鑄錢及獻帝初平中董卓乃更鑄小錢由是貨輕而物貴穀一斛至錢數百萬至魏武爲相於是罷之還用五銖是時不鑄錢旣久貨本不多又更無增益故穀賤無已及黃初二年魏文帝罷五銖錢使百姓以穀帛爲市至明帝世錢廢穀用旣久人間巧僞漸多競濕穀以要利作薄絹以爲市雖處以嚴刑而不能禁也司馬芝等舉朝大議以爲用錢非徒豐國亦所以省刑今若更鑄五銖錢則國豐刑省於事爲便魏明帝乃更立五銖錢至



晉用之不聞有所改創孫權嘉平五年鑄大錢一當五百赤烏元年又鑄當千錢故呂蒙定荊州孫權賜錢一億錢既太貴但有空名人間患之權聞百姓不以爲便省息之鑄爲器物官勿復出也私家有者竝以輪藏平卑其直勿有所枉晉自中原喪亂元帝過江用孫氏舊錢輕重雜行大者謂之比輪中者謂之四文吳興沈充又鑄小錢謂之沈郎錢錢既不多由是稍貴孝武太元三年詔曰錢國之重寶小人貪利銷壞無已監司當以爲意廣州夷人寶貴銅鼓而州境素不出銅聞官私賈人皆於此下貪比輪錢斤兩差重以入廣州貨與夷人鑄敗作鼓其重爲禁制得者科罪安帝元興中桓玄輔政立議欲廢錢用穀帛孔琳之議曰洪範八政貨爲食次豈不以交易所資爲用之至要者乎若使百姓用力於爲錢則是妨爲生之業禁之可也今農自務穀工自務器各隸其業

何當致勤於錢故聖王制無用之貨以通有用之財既無毀敗之費又省難運之苦此錢所以嗣功龜貝歷代不廢者也穀帛爲寶本充衣食分以爲貨則致損甚多又勞毀於商販之手耗棄於割截之用此之爲弊著自於曩故鍾繇曰巧僞之人競濕穀以要利制薄絹以充資魏世制以嚴刑弗能禁也是以司馬芝以爲用錢非徒豐國亦所以省刑錢之不用由於兵亂積久自致於廢有由而然漢末是也今旣用而廢之則百姓頓忘其利今括囊天下之穀以周天下之食或倉廩充溢或糧靡并儲以相資通則貧者仰富致富之道實假於錢一朝斷之便爲棄物是有錢無糧之人皆坐而饑因以此斷之又立弊也且據今用錢之處不以爲貧用穀之處不以爲富又人習來久革之必惑語曰利不自不易業况又錢便于穀邪魏明帝時錢廢穀用旣久不以便於人乃舉朝大議

精才達政之士莫不以宜復用錢下無異情朝無異論彼尚舍穀  
帛而用錢足以明穀帛之弊著於已誠也世或謂魏氏不用錢久  
積累巨萬故欲行之利公富國斯殆不然晉文後舅犯之謀而先  
成季之信以爲雖有一時之勳不如萬世之益于時名賢在列君  
子盈朝大謀天下之利害將定經國之要術若穀實便錢義不昧  
當時之近利而廢永用之通業斷可知矣斯一作思實由困而思革  
改而更張耳近存武之末天下無事時和年豐百姓樂業穀帛殷  
阜幾乎家給人足驗之實事錢又不妨人也頃兵革屢興荒饉荐  
及饑寒未振實此之由公旣援而拯之大革視聽弘敦本之教明  
廣農之科敬授人時各從其業遊蕩知反務末自休同以南畝競  
力野無遺壤矣於此以往將升平必至何衣食之足卹愚謂救弊  
之術無取於廢錢朝議多同琳之故玄議不行

